

大智度論卷第七十六

龍樹菩薩造

姚秦三藏法師鳩摩羅什譯

釋學空不證品第六十

須菩提白佛言：「世尊！若菩薩摩訶薩欲行般若波羅蜜云何學空三昧？云何入空三昧？云何學無相、無作三昧？云何入無相、無作三昧？云何學四念處？云何修四念處？乃至云何學八聖道分？云何修八聖道分？」佛告須菩提：「菩薩摩訶薩行般若波羅蜜時，應觀色空、受、想、行、識空、十二入、十八界空，乃至應觀欲、色、無色界空。作是觀時，不令心亂。是菩薩摩訶薩若心不亂，則不見是法；若不見是法，則不作證。何以故？是菩薩摩訶薩善學自相空故，不有

2829

二

餘，不有分證法，證者皆不可見。」須菩提白佛言：「世尊！如佛所說，菩薩摩訶薩不應空法作證。世尊！云何菩薩住空法中而不作證？」佛告須菩提：「若菩薩摩訶薩具足觀空，先作是願，我今不應空法作證。我今學時，非是證時。菩薩摩訶薩不專攝心繫在緣中，是故菩薩摩訶薩於阿耨多羅三藐三菩提中不退，亦不取漏盡證。須菩提！菩薩摩訶薩如是大善妙法成就，何以故？住是空中，作是念：我今是學時，非是證時。須菩提！菩薩摩訶薩應如是念：我是學檀波羅蜜時，非是證時；學尸羅波羅蜜、羼提波羅蜜、毗梨耶波羅蜜、禪波羅蜜時，修四念處時，乃至修八聖道分時，非是證時；修空三昧、無相三昧、無作三昧時，非是證時；修佛十力、四無所畏、四無礙智、十八不共法、大慈大悲時，非是證時。我今學一切種智

2830

時，非是得須陀洹果證，乃至阿羅漢果、辟支佛道證時。如是，須菩提！菩薩摩訶薩行般若波羅蜜，學空觀，住空中學無相、無作觀，住無相、無作中。修四念處不證四念處，乃至修八聖道分不證八聖道分。是菩薩雖學三十七品，雖行三十七品，而不作須陀洹果證，乃至辟支佛道。須菩提！譬如壯夫勁勇猛健，善於兵法，六十四能，堅持器仗，安立不動，巧諸技術，端正淨潔，人所愛敬。少修事業，得報利多，以是因緣，故衆所恭敬，尊重讚歎。見人敬重，倍復歡喜。少有因緣，當至他處，扶將老弱，過諸險難恐怖之處，安慰父母，曉喻妻子，莫有恐懼。我能過此，必無所苦。險難道中，多有怨賊，潛伏劫害。其人智力具足，故能度惡道，還歸本處，不遇賊害，歡喜安樂。須菩提！菩薩摩訶薩亦如是，於一切衆生中，慈悲喜捨，心徧滿足。爾

2831

時，菩薩摩訶薩住四無量心，具足六波羅蜜，不取漏盡證，學一切種智，入空、無相、無作解脫門。是時菩薩不隨一切諸相，亦不證無相三昧，以不證無相三昧故，不墮聲聞、辟支佛地。須菩提！譬如有一異之鳥，飛騰虛空而不墮墜，雖在空中，亦不住空。須菩提！菩薩摩訶薩亦如是，學空解脫門，學無相、無作解脫門，亦不作證，以不證故，不墮聲聞、辟支佛地。未具足佛十力、大慈大悲、無量諸佛法，一切種智，亦不證空、無相、無作解脫門。須菩提！譬如使人學諸射法，善於射術，仰射空中，復以後箭射於前箭，箭箭相拄，不令箭墮，隨意自在。若欲令墮，便止後箭，爾乃墮地。須菩提！菩薩摩訶薩亦如是，行般若波羅蜜，以方便力，故爲阿耨多羅三藐三菩提諸善根，未具足，不於實際作證。若善根成，是時便於實際作證。以是故，

2832

須菩提！菩薩摩訶薩行般若波羅蜜時，應如是觀諸法相！  
須菩提白佛言：「世尊！菩薩摩訶薩所爲甚難，何以故？雖學是諸法相，學實際、學如、學法性、學畢竟空，乃至學自相空及三解脫門，終不中道墮落。世尊是甚希有！」佛告須菩提：「是菩薩摩訶薩不捨一切衆生故，作如是願。須菩提！若是菩薩摩訶薩作是念：我不應捨一切衆生，一切衆生沒在無所有法中，我應當度。爾時，即入空解脫門、無相解脫門、無作解脫門。須菩提！當知是菩薩摩訶薩成就方便力，未得一切種智，行是解脫門，亦不中道取實際證。復次，須菩提！菩薩摩訶薩欲觀是諸甚深法，所謂內空乃至無法有法空、四念處乃至三解脫門。爾時，菩薩摩訶薩應生如是心：是諸衆生長夜行我相，乃至知者、見者相，著於得法，爲衆生斷是諸

相故，得阿耨多羅三藐三菩提時，當說法。爾時，菩薩行空解脫門，無相、無作解脫門，亦不取實際證，以不證故，不墮須陀洹果，乃至辟支佛道。須菩提！是菩薩摩訶薩以是心欲成就善根故，不中道實際作證，不失四禪、四無量心、四無色定、四念處，乃至八聖道分、空、無相、無作、佛十力、四無所畏、四無礙智、大慈大悲、十八不共法。是時，菩薩摩訶薩成就一切助道法，乃至阿耨多羅三藐三菩提，終不耗減。是菩薩有方便力，故常增益善法，諸根通利，勝於阿羅漢、辟支佛根。復次，須菩提！若菩薩摩訶薩作是念：衆生長夜著四顛倒，常想、樂想、淨想、我想，爲是衆生故，求薩婆若，我得阿耨多羅三藐三菩提時，爲說無常法，若不淨、無我法，是菩薩成就是心，以方便力行般若波羅蜜，不得佛三昧，未具足佛十力、四無所畏、四

無礙智、大慈大悲、十八不共法，亦不實際作證。爾時，菩薩修無作  
解脫門，雖未得阿耨多羅三藐三菩提，亦不實際作證。復次，須菩  
提！若菩薩摩訶薩，作是念：衆生長夜著得法，所謂我、衆生，乃至知  
者、見者，是色、是受、想、行、識，是入、是界，是四禪、四無量心、四無色定。  
我如是行，如我得阿耨多羅三藐三菩提時，令衆生無是得法。菩  
薩是心成就，以方便力行般若波羅蜜，未具足佛十力、四無所畏、  
四無礙智、大慈大悲、十八不共法，不於實際作證。爾時，菩薩具足  
修空三昧。復次，須菩提！若菩薩摩訶薩，作是念：衆生長夜行諸相，  
所謂男相、女相、色相、無色相，我如是行，如我得阿耨多羅三藐三  
菩提時，令衆生無是諸相過失。是心成就，以方便力行般若波羅  
蜜，未具足佛十力，乃至十八不共法，不於實際作證。爾時，菩薩摩

2835

訶薩，具足修無相三昧。」

「須菩提！若菩薩摩訶薩學六波羅蜜學內空，乃至無法有法空，  
學四念處乃至空、無相、無作解脫門，學佛十力、四無所畏、四無礙  
智、大慈大悲，學十八不共法。如是智慧成就，若著作法，若住三界，  
無有是處，是菩薩摩訶薩學助道法，行助道法時，應當試問：菩薩  
摩訶薩欲得阿耨多羅三藐三菩提，云何學是法？觀空不證實際？  
以不證故，不墮須陀洹果，乃至辟支佛道，觀無相、無作、無起、無生，  
無所有，亦不取證實際，而修行般若波羅蜜。應如是問：須菩提！若  
諸菩薩摩訶薩若試問時，是菩薩若如是答：菩薩摩訶薩但應觀  
空，但應觀無相、無作、無起、無生，無所有，是菩薩摩訶薩不應學空、  
無相、無作、無起、無生，無所有，不應學是助道法。須菩提！當知是菩

2836

薩諸佛未授阿耨多羅三藐三菩提記何以故是人不能說阿鞞跋致菩薩所學相不能示不能答若是菩薩摩訶薩能說能示能答阿鞞跋致所學相當知是菩薩摩訶薩已習學菩薩道入薄地如餘阿鞞跋致菩薩摩訶薩阿鞞跋致相」須菩提白佛言「世尊頗有未得阿鞞跋致菩薩能如是答不」佛言「有須菩提是菩薩摩訶薩六波羅蜜若聞若不聞能如是答如阿鞞跋致菩薩摩訶薩」須菩提言「世尊多有菩薩求佛道少有菩薩能如是答如阿鞞跋致菩薩摩訶薩學道無學道中」佛語須菩提「如是如是是菩薩甚少何以故菩薩摩訶薩少有如是得受記行阿鞞跋致乾慧地若有得受記是人能如是答是人善根明了諸天世人不能壞」

**論**問曰學空入空有何差別答曰初名學空後是入空因是學空果是入空方便名學空得名入空如是等二道無相無作三十七品亦如是三解脫門三十七品是聲聞辟支佛涅槃道佛勅菩薩應行是道須菩提作是念此是涅槃道云何菩薩行是法而不取涅槃證佛答菩薩觀色等一切法空是菩薩以深入禪定心不亂得利智慧力故不見是空法以不見故無所證聲聞辟支佛斷吾我捨愛著直趣涅槃是菩薩善學自相空色法中乃至微塵不留遺餘微細之分無色法中乃至不留一念直入畢竟空中乃至不見是空法可以爲證佛雖答須菩提未達佛意更問如佛所說菩薩不應空法作證今入空中云何不作證佛答以深入故能不證具足者即是深入譬如執管草捉緩則傷手若捉急則無傷菩薩

亦如是，深入空故，知空亦空，涅槃亦空，故無所證。復次，菩薩未入空時，作是思惟：我應徧觀諸法空，不應不具足知而取證。是故不專心攝念入禪，繫在空緣中。所以者何？若專心繫在空緣，則心柔軟，不能從空自出。問曰：上言深入禪定，不令心亂，今云何言不專心？答曰：今言不專心，是初入時，爲不能自出故。上言深入者，入已深，知空亦空，不令心在餘事，故言不亂。復次，是菩薩應作是念：我今未具三十二相，八十種隨形好，十力、四無所畏諸佛法，云何取涅槃證？我今是學時，薄諸煩惱，教化衆生，令入佛道。若我得佛事具足，是時當取證。是故菩薩雖入三解脫門而不取證。是中說譬喻：壯夫是菩薩，父母親族是可度衆生，險道是三界生死，惡賊是魔民及諸煩惱，器仗是菩薩五神通等種種方便力，還歸本處是

2839

菩薩所行道，安立不動，是菩薩住畢竟空，以四無量心運致，可度衆生，著涅槃安樂處。時會者，疑空中無所有，云何可行？是故佛說鳥喻：如鳥飛空虛，無所依止，而遠逝不墜。復次，是菩薩未具足道法，未至佛道，於其中間而不作證，如鳥未到所至，終不中住。學是空法，爲自斷煩惱，爲衆生故。又爲明了故，說善射譬喻：如人善於射術，弓是菩薩禪定，箭是智慧，虛空是三解脫門，地是涅槃。是菩薩以智慧箭，射三解脫門虛空，更以方便力故，以後箭射前箭，不令墮涅槃地，未具足十力等佛事，終不取證。

須菩提歡喜白佛言：諸菩薩所爲甚難，實爲希有，所謂行空而不作證。佛答是菩薩本願，諸一切衆生，令得離苦，以是本願大悲心所持故，雖行空不作證。復次，若菩薩作是念：一切衆生處在苦中，

2840

爲顛倒所縛，沒在無所有中，是時即行空、無相、無作解脫門。當知是菩薩有方便力，行三解脫門，而不捨衆生。復次，菩薩欲觀甚深法，所謂十八空、三十七品、三解脫門。先應作是念：衆生長夜著我相等。行者若直觀甚深法，或得聲聞道，或墮邪見，以無憐愍心，不能深入自相空故。是以菩薩欲觀是法，先生悲心，所謂衆生長夜著吾我心諸煩惱。長夜名久遠，無量劫來是我必不可得，但空虛誑顛倒故，受諸憂惱。菩薩見是已作願：我當爲衆生成佛道。斷是衆生著我顛倒，是時即是行空等三解脫門而不證實際。是善根成就，菩薩不取實際證，亦不失四禪等諸功德。菩薩深入空故，諸根猛利，勝於二乘。破四顛倒義，亦如上說。復次，菩薩作是念：衆生長夜著得法，所謂我、衆生，乃至若著作法，若住三界，無有是處。義

2841

皆同觀空而不取證。

問曰：云何知是菩薩未得道而能行此深空？答曰：經中自說因緣。是菩薩應試問：云何菩薩應學空而不取證？若菩薩答：但應念空，一心習行，如聲聞、辟支佛法，不但學知而已，乃至無生、無所有，亦如是。當知是菩薩未爲諸佛所授記。所以者何？不說方便學知，故觀空。若是菩薩異於上答者，當知是阿鞞跋致，已習學入於薄地。學習名先學知空，薄地名阿鞞跋致地。中諸煩惱薄，須菩提聞阿鞞跋致相，非阿鞞跋致相已，白佛言：世尊，頗有菩薩未得阿鞞跋致，能如是答不？佛言：有菩薩若聞六波羅蜜，若不聞，能如阿鞞跋致答若聞者，但從師聞，自未具足菩薩地。若不聞者，自思惟正憶念，雖未得無生忍，能求諸法相。如阿鞞跋致菩薩答，須菩提言：

2842

多有人求佛道，少能如是答。如阿鞞跋致菩薩學地，無學地中。未得無生法忍名學地，得無生法忍名無學地。佛言：少何以故？少有菩薩從諸佛受記，已從諸佛受記者，能如是答。何以故？諸法實相，唯佛能徧知。佛知此人能如法答，故懸與授記。是菩薩雖少，善根明了，能廣利益衆生，無能壞者。

釋夢誓品第六十一之上釋作夢中品

經佛告須菩提：「若菩薩摩訶薩乃至夢中不貪聲聞、辟支佛地，亦不貪三界，觀諸法如夢、如幻、如響、如燄、如化，亦不作證。須菩提！當知是阿鞞跋致菩薩摩訶薩阿鞞跋致相。復次，須菩提！菩薩摩訶薩夢中見佛，與無數百千萬億比丘、比丘尼、優婆塞、優婆夷、天龍鬼神、緊那羅等說法，從佛聞法，即解中義，隨法行。須菩提！當知

是阿鞞跋致菩薩摩訶薩阿鞞跋致相。復次，須菩提！菩薩摩訶薩夢中見佛三十二相，八十隨形好，大光明踊在虛空，於大比丘僧中說法，現大神力，化作化人，到他佛國土，施作佛事。須菩提！當知是阿鞞跋致菩薩摩訶薩阿鞞跋致相。復次，須菩提！若菩薩摩訶薩夢中見兵起，破聚落，若破城邑，若失火時，若見虎狼獅子猛害之獸，若見欲來級其頭者，若見父母喪亡，兄弟姊妹及諸親友，知識死者，見如是等種種愁苦之事，不驚不怖，亦不憂惱。從夢覺已，即時思惟：三界虛妄，皆如夢耳。我得阿耨多羅三藐三菩提時，亦當爲衆生說三界如夢。須菩提！當知是阿鞞跋致菩薩摩訶薩阿鞞跋致相。復次，須菩提！云何當知是阿鞞跋致菩薩摩訶薩得阿耨多羅三藐三菩提時，國中無三惡道？須菩提！菩薩摩訶薩若夢

中見地獄、畜生、餓鬼，作是念：我當勤精進，得阿耨多羅三藐三菩提時，令我國中無一切三惡道。何以故？是夢及諸法，無二無別。須菩提當知：是阿鞞跋致菩薩摩訶薩，阿鞞跋致相。復次，須菩提，菩薩摩訶薩夢中見地獄火燒衆生，作是誓：若我實是阿鞞跋致者，是火當滅。是火即滅，若地獄火即滅，是阿鞞跋致相。復次，若菩薩晝日見城郭火起，作是念：我夢中見阿鞞跋致行類相貌，我今實有是者，自立誓言：是火當滅。若火滅者，當知是菩薩得受阿耨多羅三藐三菩提記。住阿鞞跋致地，若火不滅，燒一家，置一家，燒一里，置一里。須菩提當知：被燒家破法業因緣厚集，以是故，燒一家，置一家，是諸衆生今世受破法餘殃，故被燒。須菩提，以是因緣，故當知是阿鞞跋致菩薩摩訶薩，阿鞞跋致相。」佛告須菩提：「今

當更爲汝說阿鞞跋致行類相貌。須菩提，若男子、若女人，爲非人所持，是時，菩薩摩訶薩作是念：若我爲過去諸佛所授記，我心清淨，求阿耨多羅三藐三菩提，行清淨正道，遠離聲聞、辟支佛心，遠離聲聞、辟支佛念，應當成阿耨多羅三藐三菩提。我必得阿耨多羅三藐三菩提，非不得。十方國土中，現在無量諸佛，無所不知，無所不見，無所不解，無所不證。諸佛知我深心，審定必當得阿耨多羅三藐三菩提，以是至誠誓故，是男子女人，爲非人所持，爲非人所惱，是非人當遠去。須菩提，是菩薩摩訶薩如是誓，若非人不去者，當知是菩薩摩訶薩未從過去諸佛受阿耨多羅三藐三菩提記。須菩提，若菩薩摩訶薩如是誓，若非人去者，當知是菩薩摩訶薩已從過去諸佛受阿耨多羅三藐三菩提記。須菩提，以是行類、

相貌當知是阿鞞跋致菩薩摩訶薩阿鞞跋致相。」

「復次須菩提菩薩摩訶薩遠離六波羅蜜及方便力不久行四念處乃至不久行空無相無作三昧未入菩薩位是菩薩爲惡魔所燒菩薩作是誓若我實從諸佛受記者是非人當去是時惡魔即作方便勅非人令去惡魔有威力勝諸非人故非人即去是時菩薩作是念以我誓力故非人去不知是惡魔力恃是證故輕弄毀憊諸餘菩薩作是言我已從諸佛受記汝等未得用是空誓無方便力故生增上慢以是事故遠離薩婆若遠離阿耨多羅三藐三菩提須菩提當知是人墮於二地若聲聞地若辟支佛地以是誓因緣故起於魔事是人以不親近依止善知識不問阿鞞跋致相故爲魔所縛益復堅固所以者何是菩薩不久行六波羅蜜無

方便力故須菩提當知是爲菩薩魔事須菩提云何菩薩摩訶薩不久行六波羅蜜乃至未入菩薩位爲惡魔所燒須菩提惡魔變化作種種身語菩薩言汝於諸佛所得受阿耨多羅三藐三菩提記汝字某汝父字某汝母字某汝兄弟姊妹字某汝七世父母名字如是汝在某方某國某城某聚落中生若見菩薩性行和柔語菩薩言汝先世亦復柔和若見急性卒暴便言汝先世亦爾若見菩薩修阿蘭若行語言汝先世亦修阿蘭若行若見菩薩乞食納衣中後不飲漿一坐食一鉢他食死屍間住露地住樹下止常坐不臥如敷坐但受三衣若少欲若知足若遠離住若不塗腳若少言語便語菩薩言汝先世亦有是行何以故汝今有此頭陀功德汝先世亦必有是功德是菩薩聞是先世事及名姓聞今讚頭陀

功德，即歡喜生憍慢心。是時惡魔語菩薩言：汝有如是功德，如是相，汝實從諸佛受阿耨多羅三藐三菩提記。須菩提！惡魔或作比丘被服，或作居士形，或作父母身，來到菩薩所，如是言：汝已得受阿耨多羅三藐三菩提記，何以故？是阿鞞跋致功德相，汝盡具足有之。須菩提！我所說實阿鞞跋致行類相貌，是人永無須菩提。當知是菩薩摩訶薩為魔所持，何以故？是阿鞞跋致行類相貌，是人永無，以聞是名字故，生憍慢心，輕弄毀憺餘人。須菩提！是名菩薩摩訶薩為魔事所持，當知是為菩薩魔事。復次，須菩提！菩薩摩訶薩不久行六波羅蜜，不知名字相，不知色相，不知受、想、行、識相。惡魔來語言：汝當來世得阿耨多羅三藐三菩提，有如是名字，隨其本念，說其名號。是無智、無方便菩薩，作是念：我先亦有是成佛名。

2849

號念，是人如我所念說，是人所說，合我本念，我必為諸佛所授記。須菩提！我所說阿鞞跋致行類相貌，是人永無，但以空名字，輕弄毀憺餘人，以是事故，遠離阿耨多羅三藐三菩提。是菩薩摩訶薩遠離般若波羅蜜，無方便力，遠離善知識，與惡知識相得，故墮二地：聲聞、辟支佛地。若久久往來生死中，然後還依止般若波羅蜜，若值善知識，常隨逐親近，故得阿耨多羅三藐三菩提。是人於是身若不即悔，當墮二地：阿羅漢地、辟支佛地。須菩提！譬如比丘於四重禁法，若犯一事，非沙門、非釋子，是人現身不得四沙門果。須菩提！是著空名字菩薩，心亦如是，輕弄毀憺餘人，故當知是罪重於比丘四禁。須菩提！置是重罪，其罪過於五逆，以受是名字故，生高心，輕弄毀憺餘人，若生是心，當知其罪甚重，如是名字等。

2850

微細魔事，菩薩當覺知。復次，須菩提，菩薩在空閑山澤曠遠之處，魔來到菩薩所讚歎遠離法，作是言善男子，汝所行是佛所稱譽遠離法，須菩提，我不讚歎遠離，所謂但在空閑山澤曠遠之處。須菩提言：「世尊，若空閑山澤曠遠之處非遠離法者，云何更有異遠離？」佛告須菩提：「若菩薩摩訶薩遠離聲聞、辟支佛心，住空閑山澤曠遠之處，是佛所許遠離法，須菩提，如是遠離法，菩薩摩訶薩應所修行，晝夜行是遠離法，是名遠離行菩薩。須菩提，若惡魔所說遠離法，空閑山澤曠遠之處，是菩薩心在憒鬧，所謂不遠離聲聞、辟支佛心，不勤修般若波羅蜜，是菩薩摩訶薩不能具足一切種智，是菩薩行惡魔所說遠離法，心不清淨，而輕餘菩薩，城傍心淨，無聲聞、辟支佛憒鬧，亦無諸餘雜惡心，具足禪定、解脫、

2851

智慧神通者，是離般若波羅蜜，無方便菩薩摩訶薩，雖在絕曠百由旬外，禽獸鬼神羅刹所住之處，若一歲百千萬億歲，若過萬億歲，不知是菩薩遠離法，所謂諸菩薩以是遠離法，深心發阿耨多羅三藐三菩提，不雜行是菩薩憒鬧行，而依受者是遠離，是人所行，佛所不許，須菩提，我所說實遠離法，是菩薩不在是中，亦不見是遠離，相何以故？但行是空遠離故。爾時，惡魔來在虛空中，住讚言：善哉，善哉，善男子，此是佛所說真遠離法，汝行是遠離，疾得阿耨多羅三藐三菩提。是菩薩摩訶薩念者是遠離，而輕易諸餘求佛道清淨比丘，以為憒鬧，以憒鬧為不憒鬧，以不憒鬧為憒鬧，應恭敬而不恭敬，不應恭敬而恭敬，是菩薩作是言：非人念我，來稱讚我，我所行者是真遠離，住城傍者，誰當稱美汝，以是因緣故，輕

2852

餘菩薩摩訶薩須菩提當知是名菩薩旃陀羅，汙染諸菩薩。是人似像菩薩，實是天上人中之大賊，亦是沙門被服中賊。如是人諸求佛道者所不應親近，不應供養恭敬。何以故？須菩提當知是人墮增上慢。以是故，若菩薩摩訶薩欲不捨一切智，欲得阿耨多羅三藐三菩提，一心欲求阿耨多羅三藐三菩提，欲利益一切衆生，不應親近是人。恭敬供養菩薩摩訶薩法，常應勤求自利，厭患世間，心常遠離三界。於是人當起慈悲喜捨心，我行菩薩道不應生如是過罪。若生當疾滅。須菩提菩薩摩訶薩當善覺是事，是事中善自勉出。

「復次，須菩提菩薩摩訶薩深心欲得阿耨多羅三藐三菩提者，當親近恭敬供養善知識。」須菩提白佛言：「世尊何等是菩薩

摩訶薩善知識？」佛告須菩提：「諸佛是菩薩摩訶薩善知識，諸菩薩摩訶薩亦是菩薩善知識。須菩提阿羅漢亦是菩薩善知識，是爲菩薩摩訶薩善知識。復次，須菩提六波羅蜜亦是菩薩善知識，四念處乃至十八不共法亦是菩薩善知識。須菩提如實際法性亦是菩薩善知識。須菩提六波羅蜜是世尊，六波羅蜜是道，六波羅蜜是大明，六波羅蜜是炬，六波羅蜜是智，六波羅蜜是慧，六波羅蜜是救，六波羅蜜是歸，六波羅蜜是洲，六波羅蜜是究竟道，六波羅蜜是父是母，四念處乃至一切種智亦如是。何以故？六波羅蜜及三十七道法亦是過去諸佛父母，六波羅蜜三十七道法亦是未來現在十方諸佛父母。何以故？須菩提六波羅蜜三十七道法中生過去未來現在十方諸佛故。以是故，須菩提菩薩摩訶

薩欲得阿耨多羅三藐三菩提，淨佛世界，成就衆生，當學六波羅蜜、三十七道法，及四攝法攝取衆生。何等四？布施、愛語、利益、同事。須菩提！以是利益故，我言六波羅蜜及三十七道法，是諸菩薩摩訶薩世尊，是道，是大明，是炬，是智，是慧，是救，是歸，是洲，是究竟道，是父，是母。須菩提！以是故，菩薩摩訶薩欲不隨他人教住，欲斷一切衆生疑，欲淨佛世界，成就衆生，當學是般若波羅蜜！所以者何？是般若波羅蜜中廣說諸法，是菩薩摩訶薩所應學處。」

論問曰：阿鞞跋致品中已廣說阿鞞跋致相，今何以更說？答曰：所說般若波羅蜜義，皆是阿鞞跋致相，但阿鞞跋致品中多說其事，餘品中亦處處有說阿鞞跋致相，但不次第。有人言：爲後來衆生異語說阿鞞跋致相。有人言：有二種阿鞞跋致：一者已得記，二者

未得記。得受記有二種：一者現前受記，二者不現前受記。不現前受記有二種：一者具足受記因緣，二者未具足受記因緣。具足受記因緣者，知諸法實相，具足六波羅蜜；不具足受記因緣者，但知諸法實相，得般若波羅蜜分，餘波羅蜜未具足。是菩薩能如阿鞞跋致菩薩答，此是前品末所說阿鞞跋致。是故次第說：夢中不貪二地，雖未具足阿鞞跋致法，亦名阿鞞跋致。欲說如是等阿鞞跋致相故，此品中次第說。是菩薩晝日常習行空故，夜夢中亦不貪三界，是人常行慈悲心於衆生，深樂佛法故，不貪二乘。若夢、若覺，觀一切法如夢、如幻等。是菩薩雖未得現前受記，餘法未具足，亦名阿鞞跋致相。何以故？菩薩於二處退轉：一者著世間樂故轉，二者取二乘故轉。是菩薩堅心深入空及慈悲心故，乃至夢中亦不

貪三界、二乘，何況覺時！復次，若菩薩夢見佛在人天大眾中說法，所謂諸法實相義；菩薩知是義，心與法合。復次，諸佛祕密法，菩薩夢中得見，所謂見佛身無量，過須彌山，色如閻浮檀金，三十二相，八十種隨形好，以自莊嚴，放無量光明，梵音聲說法，及身毛孔出無量化佛至十方，種種方便力施作佛事，度脫眾生。爾時，是菩薩見是佛神通力故，深心清淨問佛法，得諸法實相，是名阿鞞跋致。是菩薩常行畢竟空故，我、我所等諸煩惱折薄，乃至自身不惜，何況餘親！是因緣故，若夢中見若自身，若父母等，若殺若死因緣，及聚落破等，不憂惱怖畏。覺已思惟：如夢中不死而見死，不畏而見畏，一切三界皆爾，何但夢中！我作佛時，當為眾生說諸法畢竟空，皆如夢。復次，有菩薩種清淨國土因緣時，作是願：我爾許時積集

淨國土行。是心修習故，夢中若見三惡道眾生時，即得是心。我作佛時，令我國土乃至無三惡道名。復次，是菩薩常修慈悲心故，夢中見地獄火燒眾生，作誓，火即滅。覺已，取是相，若見實火燒城郭，作是念：我夢中能滅火，此火亦當可滅！所以者何？佛說夢覺無異故。是菩薩於無量劫修習福德，得諸法實相故，鬼神、龍王等助滅是火。其中有不滅，燒一家置一家者，是眾生重罪故。菩薩福德智慧力，不能滅重罪者，所謂破法業。法者，般若波羅蜜；諸餘法利益，無及般若波羅蜜者，是故破者罪重。以菩薩誓力故，不次第燒，唯罪重者不救，不妨是阿鞞跋致相。非人所持，亦如呪火。有菩薩未得無生法，忍聞是阿鞞跋致呪故，鬼去便作呪。是菩薩自未有力，魔來遣鬼神故，自恃為己力。有如是失故，佛示令覺知。

復次，菩薩未入正位，魔作種種形，隨其念而示語，汝已得受記，汝有是相，但以肉眼故不知。以是因緣故，生增上慢，輕憍餘人。復次，菩薩不得諸法實相，不知色等五衆和合邊更有名字相。魔來與授記，汝當作佛，名字某甲。是菩薩思惟：我本有是名字念，今所說者，同我所願，必是諸佛授記，是故心生憍慢，輕餘大菩薩。以是因緣故，遠離無上道，受罪畢，墮於二乘。若即此身悔，當久久償罪畢，還依止般若波羅蜜，得作佛。所以者何？若轉身乃悔，則罪重叵滅，不得作佛。是心著是空名字，得重罪故，佛說四重禁喻，破是重禁，現身不得四道果。所以者何？是四禁中，妄語稱我是阿羅漢，此中著是受前名字，自言我當作佛，是故重於四禁。過五逆罪者，如地獄品中，破般若波羅蜜罪說。微細魔事者，細名不逆其意，隨其本

2859

念，助成其心，是菩薩未得阿鞞跋致法，魔誑言已得，是微細魔事。利根菩薩，應覺除遠離。復次，菩薩在遠離處，魔來讚歎，汝能遠離親族、同學，獨在深山林中，爲佛道故，是爲眞菩薩道行，是菩薩用是故，生憍慢心，輕餘在衆中住菩薩。以是事故，遠離佛道，墮於二乘。佛種種因緣，訶是菩薩是賊，是旃陀羅等。如經中說，不應親近佛所說遠離，心離二乘、三界，是名眞遠離。如經中廣說如是等細微魔事，應當覺而遠離。

2860

復次，菩薩欲深心得無上道，深心名一心、重心，深愛佛道，出於一切世間所樂，當親近善知識，所以者何？有二因緣故得無上道：一者內，二者外。內名正憶念，思惟籌量諸法；外名諸善知識。佛餘處種種說善知識相，是故須菩提問佛：世尊何等是菩薩善知識？佛

答諸佛、大菩薩及聲聞，是菩薩善知識。六波羅蜜乃至一切種智，如法性實際等諸法，亦是善知識。法能成辦其事故，說六波羅蜜等諸法名善知識。三種聖人以此六波羅蜜法令菩薩奉行，得作佛。是故法及人，通名善知識。問曰：佛及菩薩、六波羅蜜能成菩薩故，應是善知識。小乘道異，云何能與作善知識？答曰：有小乘人先世求佛道，故利根。雖是小乘，有憐愍心，觀應成大乘者，為說大乘法，知報佛恩，故令佛種不斷。如舍利弗六十劫求佛道，雖退轉作阿羅漢，亦利根智慧，能為菩薩說大乘。須菩提常行無諍三昧，常有慈悲心於衆生，故亦能教化菩薩大乘法。如摩訶迦葉以神通力持此身，至彌勒出世，於九足山中出，與大眾作得道因緣。如是等甚多。問曰：六波羅蜜攝一切法，今何以別說三十七品？至如法

2861

性、實際？答曰：六波羅蜜是略說，四念處等是廣說。解六波羅蜜。六波羅蜜是菩薩初道，小遠。三十七品是近因緣。於六波羅蜜中，禪波羅蜜、般若波羅蜜最大。譬如雖有星宿，日月最勝。是二波羅蜜中，四念處、佛十力等法最妙，能大利益現世，令人得道。故持戒、布施等不如。故別說如等無為法，實不虛誑，故能成菩薩事。行四念處等法，得是如等法，令菩薩得出虛誑法，故名善知識。復次，是六波羅蜜等法，如佛無異。佛現在亦以是法度人，是故言世尊。如世尊所說不可壞，六波羅蜜等所說亦不可壞，是故言六波羅蜜是世尊。是道者行是道，徑入無量佛法中。六波羅蜜中所說，人壽量思惟分別，常修行，令人得大智慧，破諸世間無明，是故說六波羅蜜是大明。是大炬，是智，是慧，是救，是歸，是洲，是究竟道。如上說。般

2862

若波羅蜜是母，五波羅蜜是父，和合說故言六波羅蜜是父母。如六波羅蜜說，四念處等亦如是。是中說因緣，六波羅蜜等法，亦是三世十方佛父母。是六波羅蜜等是自利法行者欲以六波羅蜜教化衆生，淨佛世界，應以四攝法攝取衆生，四攝法義如先說。如是自利利他故，佛說六波羅蜜、三十七品等諸法，是世尊、是道等。是故菩薩若欲不隨他教，不隨他教名，自知諸法實相，乃至變作佛身來說，異於法相，亦不信不隨。自得菩薩道，漸漸具足諸佛法，淨佛世界，成就衆生，得佛道，能斷一切衆生疑。若欲得是者，當學般若。般若波羅蜜中，世間、出世間，若大若小，無事不說。

大智度論卷第七十六

校譌

2863

第十面 三行勅宋  
南藏作勅

音釋

勁 居正切 強也 管 居頤切 茅屬 綏 胡管切 舒也 級 居立切 首曰級 媯 而沼切 媯而沼切 懷 莫結切 輕易也 曠 苦誘切 曠遠也 憤 古對切 心亂也 鬧 奴教切 不靜也

2864

大智度論卷第七十七

龍樹菩薩造

姚秦三藏法師鳩摩羅什譯

釋夢誓品第六十一之下

經爾時須菩提白佛言：「世尊何等是般若波羅蜜相？」佛告須菩提：「如虛空相，是般若波羅蜜相。須菩提！般若波羅蜜無所有相。」須菩提白佛言：「世尊頗有因緣，如般若波羅蜜相，諸法相亦如是耶？」佛告須菩提：「如是如是！如般若波羅蜜相，諸法相亦如是。何以故？須菩提！一切法離相、空相，以是因緣故。須菩提！如般若波羅蜜相，諸法相亦如是，所謂離相、空相故。」須菩提白佛言：「世尊！若一切法一切法離，一切法一切法空，云何知衆生若

2865

大智度論卷七十七

釋夢誓品第六十一之下

大智度論卷七十七

釋夢誓品第六十一之下

二

垢若淨？世尊！離相法無垢、無淨，空相法無垢、無淨，離相、空相法不能得阿耨多羅三藐三菩提，離相、空相無法可得。世尊！離相中空相中，無有菩薩得阿耨多羅三藐三菩提者。世尊！我云何當知佛所說義？」佛告須菩提：「於汝意云何？是衆生長夜行我、我所心不？」「如是，世尊！」衆生長夜行我、我所心，於汝意云何？是我、我所心離相、不空相不？」須菩提言：「世尊！我、我所心離相、空相。」於汝意云何？以此我、我所心衆生往來生死中不？」「如是，世尊！以此我、我所心衆生往來生死中。」如是，須菩提！衆生往來生死中故，知有垢惱。須菩提！若衆生無我、我所心，無著心，是衆生不復往來生死中。若不往來生死中，則無垢惱。如是，須菩提！衆生有淨。」須菩提白佛言：「世尊！若菩薩摩訶薩如是行，爲不行色、不行受、想、行、

2866

識爲不行四念處，乃至八聖道分爲不行內空，乃至無法有法空，  
爲不行佛十力，乃至一切種智。何以故？是法不可得，亦無行者，亦  
無行處，亦無行法。世尊！菩薩摩訶薩如是行，一切世間諸天、人、阿  
修羅不能降伏。是菩薩摩訶薩一切聲聞、辟支佛所不能及。何以  
故？所住處無能及故，所謂菩薩位。世尊！是菩薩摩訶薩行應薩婆  
若心無能及者。」

「須菩提！菩薩摩訶薩如是行，疾近薩婆若。須菩提！於汝意云何？  
若閻浮提衆生盡得人身，得人身已，皆得阿耨多羅三藐三菩提。  
若有善男子、善女人，盡其形壽，供養恭敬，尊重讚歎，持是善根，迴  
向阿耨多羅三藐三菩提，是人以是因緣，得福多不？」須菩提言：  
「甚多世尊！」佛言：「不如是善男子、善女人於大衆中說是般

若波羅蜜，出示分別，照明開演，亦應般若波羅蜜行正憶念，其福  
多。乃至三千大千世界中衆生，亦如是。須菩提！於汝意云何？閻浮  
提中衆生一時皆得人身，得人身已，若善男子、善女人教行十善  
道，四禪，四無量心，四無色定，教令得須陀洹道，乃至阿羅漢、辟支  
佛道，教令得阿耨多羅三藐三菩提，持是善根，迴向阿耨多羅三  
藐三菩提。須菩提！於汝意云何？是善男子、善女人得福多不？」須  
菩提言：「甚多世尊！」佛言：「不如是善男子、善女人以是甚深般  
若波羅蜜爲衆生說，出示分別，照明開演，亦不離薩婆若，得福多。  
乃至三千大千世界，亦如是。是菩薩摩訶薩不遠離應薩婆若心，  
則到一切福田邊。何以故？除諸佛，無有餘法如菩薩摩訶薩勢力。  
何以故？諸菩薩摩訶薩行般若波羅蜜時，於一切衆生中起大慈

心見諸衆生趣死地故而起大悲行是道時歡悅而生大喜不與想俱便得大捨。須菩提！是爲菩薩摩訶薩大智光明。大智光明者，所謂六波羅蜜。須菩提！是諸善男子雖未作佛，能爲一切衆生作大福田。於阿耨多羅三藐三菩提亦不轉。所受供養衣服飲食臥具牀敷疾藥資生所須，行應般若波羅蜜，念能畢報施主之恩，疾近薩婆若。以是故，須菩提！若菩薩摩訶薩欲不虛食國中施，欲示衆生三乘道，欲爲衆生作大明，欲拔出三界牢獄，欲與一切衆生眼，應常行般若波羅蜜。行般若波羅蜜時，若欲有說，但說般若波羅蜜；說般若波羅蜜已，常憶念般若波羅蜜；常憶念般若波羅蜜已，常行般若波羅蜜，不令餘念得生。晝夜勤行般若波羅蜜，相應念，不息不休。須菩提！譬如士夫未曾得摩尼珠，後時得，得已大歡

喜踊躍，後復失之，便大憂愁，常憶念是摩尼珠。作是念：我奈何！忽亡此大寶，須菩提！菩薩摩訶薩亦如是，常憶念般若波羅蜜，不離薩婆若心。須菩提白佛言：「世尊！一切念性自離，一切念性自空。云何菩薩摩訶薩行般若波羅蜜，不離應薩婆若念，是遠離空法中無菩薩，亦無念，無應薩婆若。」佛告須菩提：「若菩薩摩訶薩如是知一切法性自離，一切法性自空，非聲聞、辟支佛作，亦非佛作，諸法相常住，法相、法住、法位，如實際，是名菩薩行般若波羅蜜，不離薩婆若念。何以故？般若波羅蜜性自離，性自空，不增不減故。」須菩提白佛言：「世尊！若般若波羅蜜性自離，性自空，云何菩薩摩訶薩與般若波羅蜜等，得阿耨多羅三藐三菩提？」佛告須菩提：「菩薩摩訶薩與般若波羅蜜等，不增不減，何以故？如法

性實際，不增不減故。所以者何？般若波羅蜜非一非異故。若菩薩聞如是般若波羅蜜相，心不驚、不沒、不畏、不怖、不疑。須菩提！當知是菩薩摩訶薩行般若波羅蜜，當知是菩薩摩訶薩必住阿鞞跋致地中。」

須菩提白佛言：「世尊！般若波羅蜜空無所有，不堅固，是行般若波羅蜜不？」不也。須菩提！「世尊！離空更有法行般若波羅蜜不？」不也。須菩提！「世尊！是般若波羅蜜行般若波羅蜜不？」不也。須菩提！「世尊！離般若波羅蜜行般若波羅蜜不？」不也。須菩提！「世尊！色是行般若波羅蜜不？」不也。須菩提！「世尊！受、想、行、識是行般若波羅蜜不？」不也。須菩提！「世尊！六波羅蜜是行般若波羅蜜不？」不也。須菩提！「世尊！四念處乃至十八不共法，是行

般若波羅蜜不？」不也。須菩提！「世尊！色空相，虛誑不實，無所有，不堅固相，色如相、法相、法住、法位實際，是行般若波羅蜜不？」不也。須菩提！「世尊！受、想、行、識乃至十八不共法空相，虛誑不實，無所有，不堅固相，如法相、法住、法位實際，是行般若波羅蜜不？」不也。須菩提！「世尊！若是諸法皆不行般若波羅蜜，云何行名菩薩摩訶薩行般若波羅蜜？」佛告須菩提：「於汝意云何？汝見有法行般若波羅蜜者不？」不也。世尊！「須菩提！汝見般若波羅蜜菩薩摩訶薩可行處不？」不也。世尊！「須菩提！汝所不見法，是法可得不？」不也。世尊！「須菩提！若法不可得，是法當生不？」不也。世尊！「須菩提！是名菩薩摩訶薩無生法。忍菩薩摩訶薩成就是忍，得受阿耨多羅三藐三菩提。須菩提！是名諸佛無所畏無礙智。」

菩薩摩訶薩行是法勤精進，若不得大智，一切種智，所謂阿耨多羅三藐三菩提智者，無有是處，何以故？是菩薩摩訶薩得無生法忍故，乃至阿耨多羅三藐三菩提不減不退。

須菩提白佛言：「世尊！諸法無生相，此中得阿耨多羅三藐三菩提記不？」佛言：「不也，須菩提！」世尊！諸法生相，此中得阿耨多羅三藐三菩提記不？」佛言：「不也，須菩提！」世尊！諸法非生非不生相，得阿耨多羅三藐三菩提記不？」佛言：「不也，須菩提！」世尊！諸菩薩摩訶薩云何知諸法得阿耨多羅三藐三菩提記？佛告須菩提：「汝見有法得阿耨多羅三藐三菩提記不？」佛言：「不也，世尊！我不見有法得阿耨多羅三藐三菩提記，我亦不見法有得者得處。」佛言：「如是如是，須菩提！若菩薩摩訶薩於一切法無所得時，不作是念，我當得。」

阿耨多羅三藐三菩提，用是事得阿耨多羅三藐三菩提，是名阿耨多羅三藐三菩提處。何以故？諸菩薩摩訶薩行般若波羅蜜，無諸憶想分別。所以者何？般若波羅蜜中，無諸分別憶想故。

論問曰：上已種種說般若相，今何以更問？答曰：般若波羅蜜第一微妙，聞者無厭足，無滿時，無一定相，故不應難。如十住大菩薩於般若波羅蜜猶未滿足，何況須菩提小乘人。復次，上聞種種讚般若，是父是母等，是故更問。佛因須菩提問，為餘衆生故，廣說般若波羅蜜相。須菩提所謂虛空相，是般若波羅蜜相，如虛空無色相，無非色相，般若波羅蜜亦如是，無所有相。須菩提更問，頗有因緣，諸法相如般若相不？佛答：有一切法究竟空，究竟離相，故說如般若波羅蜜相，一切法亦如是。須菩提難若一切法離相、空相，云何

知有垢淨云何菩薩得無上道佛告須菩提於汝意云何衆生長夜行我我所等是佛所說義如我我所畢竟無衆生狂顛倒因緣故生諸煩惱煩惱因緣故有業業因緣故於生死中往來是事本末空何以故我無故我所心虛誑我所心虛誑故諸餘因果展轉法皆是虛誑若因般若波羅蜜實智慧觀五衆無常苦空無我離自相自相空從本來畢竟不生爾時我我所心則滅如日出衆冥皆除我我所心滅故餘煩惱滅餘煩惱滅故業因緣亦滅業因緣滅故往來生死中斷是名爲淨雖一切法相皆空亦以如是因緣故有淨有垢爾時須菩提思惟籌量佛語已白佛言世尊菩薩如是行實不行色等一切法何以故是菩薩不得是法若行行處行者世尊若菩薩能如是行一切人天世間無能降伏者世間人皆

著假名是行者行實法是故不能伏世間人著一切虛誑顛倒及虛誑果報是菩薩於畢竟空中尚不著何況餘法如是云何可降伏天人阿修羅世間者是三種善道中有智慧人故說不能伏又復一切聲聞辟支佛所不能及者上三善道據未得道人此中說得道者不能及此中說不能及因緣所謂菩薩入法位一切魔魔所使無能惱者是菩薩常行應薩婆若心則近阿耨多羅三藐三菩提何以故不著一切法常集一切助道法故佛可其言而讚佛欲以如是智慧爲他人說故先讚菩薩自利益今爲利益他分別福德果報故問須菩提於汝意云何閻浮提衆生盡得人身如經廣說乃至應薩婆若心出一切福田之上是中說因緣若菩薩能自行般若波羅蜜亦能教他是人於一切福田能到其邊福田

者從須陀洹乃至佛。是菩薩能如所說般若履行，則得作佛。餘福德善法，離般若波羅蜜故皆盡。般若波羅蜜不可盡故言無有餘福德。如菩薩摩訶薩力勢者，是中自說因緣。菩薩行般若時得諸法平等忍，得平等忍故，雖行空亦能生四無量心。四無量心中大悲是大乘之本，見衆生就於死法如囚受戮。諸菩薩能生六波羅蜜等，乃至一切種智，是故是人雖未得無上道已是一切衆生之福田。是故言菩薩摩訶薩若欲不空食國中施者，當學般若波羅蜜。不空食名能報施主，能生道能令施主之福無盡，乃至入涅槃。若示衆生三乘道爲衆生示一切智大明，亦欲拔出三界獄中四縛，欲令衆生得五眼，應常行般若波羅蜜相應念，相應念者即是般若心。若行般若波羅蜜心，若有所說，但說般若波羅蜜。佛勅弟

2877

子若和合共住，常行二事：一者賢聖默然，二者說法。賢聖默然者，是般若心，說法者說般若波羅蜜。是人從般若心出說般若波羅蜜，說般若波羅蜜已還入般若中，不令餘心餘語得入，晝夜常行，是不休不息，如是得先所說功德。佛欲令是事明了，故說譬喻。如貧人失大價寶，常念不離，菩薩亦如是不離薩婆若心，常行般若波羅蜜，不休不息。爾時須菩提聞是事，白佛言：世尊若一切諸念空，云何菩薩不離薩婆若念？空中菩薩不可得，薩婆若亦不可得。佛答若菩薩知一切法離自性，非聲聞、辟支佛所作，亦非佛所作，自從因緣出諸法相，如實際常住世間，即是菩薩不離般若波羅蜜行。佛自說因緣，般若波羅蜜空故，離故不增不減。須菩提聞是，復問佛：若般若波羅蜜性空，云何菩薩與般若合得無上道？佛隨

2878

須菩提語若菩薩與般若波羅蜜合則不增不減諸法如法性實際不增不減故般若波羅蜜不增不減般若波羅蜜即是諸法如法性實際如法性實際即是般若波羅蜜此中佛自說因緣如如等三法非一非異般若亦如是世間法非一即是一不異即是一般若波羅蜜則不爾是故般若波羅蜜無量無邊空無相無作故不增不減若菩薩得是不增不減則能得阿耨多羅三藐三菩提。若菩薩聞是事通達無礙入佛智慧雖未作佛信力故於佛法中亦無疑不怖不畏所以者何凡夫著我心故有畏是菩薩我想斷故無所畏當知是菩薩即住阿鞞跋致地亦能正行般若。須菩提聞是菩薩正行般若波羅蜜是故問佛世尊般若波羅蜜觀一切空不牢固是空相爲行般若不佛言不也何以故若空無

2879

有法云何行般若離是空更有法行般若不佛言不也何以故若一切法空無相無作云何離空更有法是故說不須菩提聞空非行般若離空非行般若一切法皆攝在般若中今但問般若行般若不法不自行應以異法行是故言不復問離般若更有法行般若不佛言不何以故一切法攝在般若中更無法行般若先來略問行般若者今問名字因緣五衆行般若不佛言不何以故是五衆從虛誑和合因緣不自在故無作相云何能行須菩提更問若菩薩假名字空不實故不行般若今六波羅蜜等諸助道法行般若波羅蜜不佛言不何以故如五衆和合有故不能行是諸法亦如是色等法空相不牢固如法相法位法住實際是法行般若不佛答是法無爲法不生不滅常住自性故不行須菩提問佛世尊

2880

假名字故，人不行，諸法亦和合因緣生，無自性故亦不行，誰當行般若？若不行，云何得無上道？今佛以反問答於汝，意云：何須菩提從佛急求行般若者？是故佛問汝：以慧眼見，定有一法行般若不？須菩提因三解脫門，入諸法實相中，法相不可得，何況行者？是故答言：世尊！不見有行般若者。復問：汝見是般若波羅蜜菩薩行處不？須菩提答言：不見。何以故？般若波羅蜜中一切諸觀滅，若常若無常，若生滅等，無一法定相是般若。云何當說是般若波羅蜜？復問：若汝以智慧眼不見法，是不見法爲有爲無？答言：無。何以故？佛說智慧眼實，肉眼、天眼虛誑，須菩提以慧眼觀，不見，故言無。復問：若法無，不可得，是法有生不？答言：不生。是法本自無，畢竟空無所有，是法有無等戲論已滅，云何有生？佛語須菩提：若菩薩於是法

中通達無疑，信力、智慧力故，能住是法中，是名無生忍。五衆中假名菩薩得如是法，是名行般若波羅蜜。世俗法故說，非第一義。第一義中，諸戲論語言，即是無生。得是無生忍，便受無上道記。佛言：若菩薩一心勤精進，不休不息，隨無生忍行，不得是大智慧、無上智慧、一切智，無有是處。何以故？如經說：若無因無緣，則無果報。邪因緣亦無果報，因緣少亦無果報。如是菩薩得是無生法忍，捨是生死肉身，得法性生身，住菩薩果報神通中，一時能作無量變化身，淨佛世界，度脫衆生，是人末後身具足佛法，坐道場，具足正因緣。若不得阿耨多羅三藐三菩提，無有是處。所以者何？是人得無生忍法，一心直進，無有廢退故。菩薩未得無生法忍，深著世間法，諸煩惱厚，雖有福德善心，濡薄不集，故爲煩惱所遮，得無生法忍，

無復是事。未得無生法忍，用力艱難，譬如陸行得無生法忍已，用力甚易，譬如乘船。

是故無生法忍諸菩薩所貴，以是貴故，須菩提問：世尊得無生法故受記，佛言不也，何以故？無生法不生不滅，無得相，云何因是受記？復問：生法得記耶？佛言不得，何以故？生法虛誑，妄語作法，云何得阿耨多羅三藐三菩提？真實法復問：生不生得受記不？佛言不也，何以故？此二俱有過故。復問：世尊若爾者，云何當受記？佛反問：汝以慧眼觀，見有法與菩薩受記不？答言不見，何以故？是法從本已來寂滅相，是中無見不見，受記不受記，亦不見阿耨多羅三藐三菩提，亦無得法，亦無得者。此中自說因緣，般若波羅蜜無是憶想分別。問曰：須菩提上問菩薩得無生忍故受記，佛言不，佛何以

還以無生理答，所謂菩薩行般若時，無一切憶想分別。答曰：行者實以無生忍故受記，而須菩提為菩薩故，以著心得心問，以是故言不。如一切法實無我，婆蹉梵志問佛有我不，佛默然不答。無我不，佛亦不答。一切雖實無我，以梵志著心問，欲戲弄無我，故不答。須菩提問意，知定有受記事，但不知觀何法得記，故問。是故佛以須菩提所得法問，汝以慧眼見定有法受記不？須菩提住三解脫門中，觀法性，不見定有受記者，諸法法性無相無量故。若不見受記法，云何當得阿耨多羅三藐三菩提者？須菩提聞是受記者空，難情則息，自解無疑。佛可其意如是如是，汝不見不得法是實，何以故？般若波羅蜜相，無所分別故。

爾時釋提桓因白佛言：「世尊是般若波羅蜜無諸憶想分別，畢竟離故。世尊是衆生聞是般若波羅蜜能受持讀誦說正憶念，親近如說行乃至阿耨多羅三藐三菩提不雜餘心心數法者，不從小功德來。」佛言：「如是如是聞是深般若波羅蜜乃至不雜餘心心數法者，不從小功德來。憍尸迦於汝意云何？若閻浮提衆生成就十善道四禪四無量心四無色定復有善男子善女人受持深般若波羅蜜讀誦親近正憶念如說行勝於閻浮提衆生成就十善道乃至四無色定百倍千倍千萬億倍乃至算數譬喻所不能及。」爾時有一比丘語釋提桓因：「憍尸迦是善男子善女人行般若波羅蜜功德勝於仁者。」釋提桓因言：「是善男子善女人一發心尚勝於我，何況聞是般若波羅蜜書持讀誦正憶念。」

如說行是善男子善女人行般若波羅蜜，非但勝我，亦勝一切世間天及人阿修羅，非但勝一切世間天及人阿修羅，亦勝諸須陀洹斯陀含阿那含阿羅漢辟支佛，非但勝是須陀洹乃至辟支佛，亦勝菩薩行五波羅蜜，遠離般若波羅蜜者，非但勝菩薩行五波羅蜜，遠離般若波羅蜜者，亦勝菩薩行般若波羅蜜無方便力者。是菩薩摩訶薩如說行般若波羅蜜，不斷佛種常見諸佛，疾近道場。菩薩如是行爲欲拔出衆生沈沒長流者，是菩薩如是學爲不學聲聞辟支佛學。菩薩如是學，四天王天來至菩薩所，如是言：善男子當勤疾學坐道場成阿耨多羅三藐三菩提時，如過去諸佛所受四鉢，亦當應受我當持來奉上菩薩。及諸餘天四天王天三十三天夜摩天兜率陀天化樂天他化自在天梵天乃至首陀會

天亦當供養十方諸佛，亦常念是菩薩摩訶薩，如說行是深般若波羅蜜者，是菩薩諸所有世間厄難勤苦之事，永無復有一切世間有四百四病，是菩薩身中無是諸病，以行深般若波羅蜜故，得是現世功德。」爾時阿難作是念：「釋提桓因自以力說耶？以佛神力說乎？」釋提桓因知阿難意所念，語阿難言：「我之所說，皆佛威神！」佛告阿難：「如是如是，如釋提桓因所說，皆佛威神。」

「阿難是菩薩摩訶薩，習學是深般若波羅蜜時，三千大千世界中諸惡魔，皆生狐疑，今是菩薩為當得阿耨多羅三藐三菩提，當中道於實際作證，墮擊聞，辟支佛地。復次阿難，若菩薩摩訶薩不離般若波羅蜜時，魔大愁毒如箭入心，是時魔復放大火風，四方俱起，欲令菩薩心沒恐怖懈怠，於薩婆若中乃至起一亂念。」阿

2887

大智度論卷七十七 釋魔愁品第六十二

三三

大智度論卷七十七 釋魔愁品第六十二

三四

難白佛言：「世尊，魔為都燒亂諸菩薩，有不燒亂者？」佛告阿難：「有燒者，有不燒者。」阿難白佛言：「世尊，何等菩薩為惡魔所燒？」佛言：「有菩薩摩訶薩，先世聞是深般若波羅蜜，心不信解，如是菩薩魔得其便。復次阿難，菩薩聞說是深般若波羅蜜時，意疑是般若波羅蜜為實，有為實無，如是菩薩魔得其便。復次阿難，有菩薩遠離善知識，為惡知識所攝，故不聞深般若波羅蜜，不聞故不知不見，不問云何應行般若波羅蜜，云何應修般若波羅蜜，是菩薩惡魔得其便。復次阿難，若菩薩遠離般若波羅蜜，受惡法，是菩薩為惡魔得便。魔作是念：是輩當有伴黨，當滿我願，是菩薩自墮二地，亦使他人墮於二地。復次阿難，若菩薩聞說深般若波羅蜜時，語他人言：是般若波羅蜜甚深，我尚不能得底，汝復用聞，

2888

用學是般若波羅蜜爲如是菩薩魔得其便。復次阿難若菩薩輕  
餘菩薩言我行般若波羅蜜行遠離空汝無是功德。是時惡魔大  
歡喜踊躍。若有菩薩自恃名姓多人知識故輕餘行善菩薩是人  
無實阿鞞跋致行類相貌功德無是功德故生諸煩惱但著虛名  
故輕賤餘人言汝不在如我所得法中。爾時惡魔作是念今我境  
界宮殿不空增益三惡道惡魔助其威力令餘人信受其語信受  
其語故受行其經如說修學如說修學時增益諸結使是諸人心  
顛倒故身口意業所作皆受惡報以是因緣增益三惡道魔之眷  
屬宮殿益多阿難魔見是利故大歡喜踊躍阿難若行菩薩道者  
與求聲聞道家者共諍鬪魔作是念是遠離薩婆若阿難若菩薩  
菩薩共諍鬪瞋志罵詈是時惡魔便大歡喜踊躍言兩離薩婆若

遠。復次阿難若未受記菩薩向得記菩薩生惡心諍鬪罵詈隨起  
念多少劫若干劫數若不捨一切種智然後乃補爾所劫大莊嚴。  
阿難白佛言「世尊是惡心乃經爾所劫數於其中間寧得出除  
不」佛告阿難「我雖說求菩薩道及聲聞人得出罪阿難若求  
菩薩道人共鬪諍瞋志罵詈懷恨不悔不捨者我不說有出必當  
更爾所劫數若不捨一切種智然後乃大莊嚴阿難若是菩薩鬪  
諍瞋志罵詈便自改悔作是念我爲大失我當爲一切衆生下屈  
今世後世皆使和解我當忍受一切衆生履踐如橋梁如犍如啞  
云何以惡語報人我不應壞是甚深阿耨多羅三藐三菩提心我  
得阿耨多羅三藐三菩提時應當度是一切苦惱衆生云何當起  
瞋志」阿難白佛言「世尊菩薩菩薩共住云何」佛告阿難「菩

薩菩薩共住，相視當如世尊。何以故？是菩薩摩訶薩應作是念：是我真伴，共乘一船。彼學我學，所謂檀波羅蜜，乃至一切種智。若是菩薩雜行，離薩婆若心，我不應如是學。若是菩薩不雜行，不離薩婆若心，我亦應如是學。菩薩摩訶薩如是學者，是爲同學。」

論釋曰：釋提桓因上說善男子書受持般若，乃至正憶念得無量功德，今說其義。是人讀誦般若，乃至阿耨多羅三藐三菩提，不令餘心心數雜者，得如上所說功德。但從聞說而不能行，餘心不入者，雖得功德，不名爲無上。餘心心數法雜者，有人言慳貪等及破六波羅蜜惡心是。有人言但不令惡心增長，成其勢力，來則滅除。有人言不令聲聞辟支佛心得入。有人言無記散亂心雖非惡，以遮善道故，亦不令得入。是故是人，不從小功德來。佛可其言如是！

欲分別清淨行勢力故，反問僑尸迦：若閻浮提人一切成就十善道等，如經說是福德雖多，離諸法實相故，虛妄不牢固，無常盡滅，不足爲多。如草芥雖多，不如一小金剛。問曰：是比丘何以語帝釋？善男子，福德勝仁者。答曰：帝釋已住福德果報中，人天之主，威德尊重，是比丘重是善法，欲顯此功德，故言勝於仁者。復次，是比丘聞帝釋得聲聞道，是故言汝雖有福德，是菩薩勝汝。帝釋得道，深念佛法，故不生高心，受其語言。菩薩爲阿耨多羅三藐三菩提，但發心便勝我，何況如所說行！何以故？帝釋福報微薄，是菩薩功德純厚。又以帝釋福德著天樂，自爲其身。菩薩功德爲一切衆生迴向佛道樂故。時會聽者聞比丘說勝於仁者，帝釋受其語，咸生輕帝釋心。是故帝釋言：不但勝我，乃至勝菩薩行般若無方便力者，

如所說行般若波羅蜜時，不離餘心心數法故。是中帝釋自說勝因緣，所謂是菩薩如說行般若不斷佛種乃至以行般若波羅蜜故，得是現世功德。問曰：阿難何以作是念言：帝釋自以力說，用佛力說？答曰：阿難知帝釋是聲聞，而所說甚深，過聲聞、辟支佛智，是故生疑而問。問曰：帝釋自有智能問能答，何以言佛力？答曰：般若甚深甚難，無量無邊，若在異處說尚難，何況於佛前大眾中說！是故言佛力。如持心經說：以光明威神入其身故，能於佛前難問有所說。

佛告阿難，可帝釋所語，更歎行深般若菩薩有大威德。所謂阿難，是菩薩習學深般若時，惡魔生疑，惡魔是菩薩怨賊，常求菩薩便，如魔品中說。以菩薩深行般若波羅蜜故，魔大作方便，壞菩薩心。

若菩薩懈怠者，魔大歡喜，是人自當墮落。有人言：一切菩薩應有魔怨，是故阿難問為盡有魔，亦有無者。佛分別答：所謂深清淨心，行菩薩道，則無魔擾；不清淨為魔所壞，如經廣說。問曰：如佛所說一切有為法，皆可轉可捨，阿難何以疑而問佛是罪可悔？不答曰：阿難知般若波羅蜜是無盡因緣，若供養福無邊，乃至得佛，福猶不盡；若訶瞋，罪亦如是無邊，是故問佛。佛答：我法雖有出罪，若菩薩共鬪結恨，不即捨則不可出。何以故？是菩薩深心輕慢，瞋餘菩薩故。以瞋慢憍故，不能下意共悔，欲更行餘功德求滅此罪。佛言：此罪不出，以懷恨故，雖作餘福德，皆不清淨，不清淨故無力，無力故不能滅罪。此人若欲作佛，不捨一切智，下意懺悔者，補爾所劫，乃得發大莊嚴。問曰：心中懷恨云何可滅？答曰：破瞋因緣，如經說。

阿難知一切衆生屬業因緣，不得自在無能救者，心懷怖畏，問佛：菩薩共住云何？云何用心恭敬？佛答：供養恭敬，當如視佛，是未來佛故。此中佛自說因緣：菩薩共住，應作是念：是我眞伴，俱到佛道，共乘一船。船者，六波羅蜜；三界三漏爲水，彼岸是佛道。彼所學者，我亦應學。學者，所謂六波羅蜜等，同戒、同見、同道。如白衣兄弟，不應共鬪，我是同法兄弟，亦不應共諍。若是菩薩雜行，離薩婆若心，我不應如是學。何以故？勝事應從他學，惡事應捨。菩薩若作是學，輕慢、瞋恨事皆滅，是則名菩薩同學。

### 釋等學品第六十三

須菩提白佛言：「世尊！何等是菩薩摩訶薩等法，菩薩所應學？」  
佛告須菩提：「內空是菩薩等法，外空乃至自相空是菩薩等法。須菩

提：色、色相空、受、想、行、識、識相空，乃至阿耨多羅三藐三菩提。阿耨多羅三藐三菩提相空，須菩提！是名菩薩摩訶薩等法。住是等法，得阿耨多羅三藐三菩提。」須菩提白佛言：「世尊！若菩薩摩訶薩爲色盡故學，爲學薩婆若；爲色離故學，爲色滅故學，爲學薩婆若；爲色不生故學，爲學薩婆若。受、想、行、識，亦如是。修行四念處，乃至十八不共法盡離滅不生故學，爲學薩婆若。」佛告須菩提：「如須菩提所說，爲色盡離滅不生故學，爲學薩婆若。受、想、行、識，乃至十八不共法盡離滅不生故學，爲學薩婆若。」佛告須菩提：「於汝意云何？色如受、想、行、識如，乃至阿耨多羅三藐三菩提如，佛如是諸如盡滅斷不。」須菩提言：「不也，世尊！」佛告須菩提：「菩薩摩訶薩如是學如，爲學薩婆若是如，不作證、不滅、不斷。須菩提！

菩薩摩訶薩如是學，如爲學薩婆若，須菩提！菩薩摩訶薩如是學，  
爲學六波羅蜜，爲學四念處，乃至十八不共法，若學六波羅蜜，乃  
至十八不共法，爲學薩婆若，須菩提！如是學，爲盡諸學邊，如是學，  
魔若魔天所不能壞，如是學，直到阿鞞跋致地，如是學，爲學佛所  
行道，如是學，爲得擁護，爲學大慈大悲，爲學淨佛世界，成就衆生。  
須菩提！如是學，爲學三轉十二行法輪轉故，如是學，爲學度衆生，  
如是學，爲學不斷佛種，如是學，爲學開甘露門，如是學，爲學欲示  
無爲性，須菩提！下劣之人不能作是學，如是學者，爲欲拔沈沒生  
死衆生。菩薩摩訶薩如是學，終不墮地獄，餓鬼，畜生中，終不生邊  
地，終不生耨陀羅家，終不聾盲瘡痂，拘躄，諸根不缺，眷屬成就，終  
不孤窮。菩薩如是學，終不殺生，乃至終不邪見，如是學，不作邪命。

2897

活，不攝惡人及破戒者，如是學，以方便力故，不生長壽夭，何等是  
方便力？如般若波羅蜜品中所說。菩薩摩訶薩以方便力故，入四  
禪，四無量心，四無色定，不隨禪無量無色定生。須菩提！菩薩如是  
學，一切法中得清淨，所謂淨聲聞、辟支佛心。須菩提！白佛言：「世  
尊！一切法本性清淨，云何言菩薩一切法中得清淨？」佛告須菩  
提：「如是，如是一切諸法本性清淨，若菩薩摩訶薩於是法中心  
通達不沒，即是般若波羅蜜。如是諸法，一切凡夫人不知不見。菩  
薩摩訶薩爲是衆生故，行檀波羅蜜，乃至般若波羅蜜，行四念處，  
乃至一切種智。須菩提！菩薩如是學，於一切法中得智力，無所畏。  
如是學，爲了知一切衆生心所趣向，譬如大地，少所處出金銀珍  
寶。須菩提！衆生亦如是，少所人能學般若波羅蜜，多墮聲聞、辟支

2898

佛地。須菩提！譬如少所人受行轉輪聖王業，多受行小王業。如是，須菩提！少所衆生行般若波羅蜜，求一切智，多行聲聞、辟支佛道。須菩提！諸菩薩摩訶薩發心求阿耨多羅三藐三菩提中，少有如說行，多住聲聞、辟支佛地。多有菩薩摩訶薩行般若波羅蜜，無方便力故，少所人住阿鞞跋致地。須菩提！以是故，菩薩摩訶薩欲住阿鞞跋致地，欲在阿鞞跋致數中，應當學是深般若波羅蜜。

「復次，須菩提！菩薩摩訶薩學是般若波羅蜜時，不生慳貪心，不生破戒、瞋恚、懈怠、散亂、愚癡心，不生諸餘過失心，不生取色相、取受、想、行、識相心，不生取四念處相心，乃至不生取阿耨多羅三藐三菩提相心。何以故？是菩薩摩訶薩行是深般若波羅蜜，無有法可得，以不可得故，於諸法不生心取相。須菩提！菩薩摩訶薩如是

學深般若波羅蜜，總攝諸波羅蜜，令諸波羅蜜增長，諸波羅蜜悉隨從。何以故？須菩提！是深般若波羅蜜，諸波羅蜜悉入中。須菩提！譬如我見中，悉攝六十二見。如是，須菩提！是深般若波羅蜜，悉攝諸波羅蜜。須菩提！譬如人命根滅，故餘根悉隨滅。如是，須菩提！菩薩摩訶薩行深般若波羅蜜時，諸波羅蜜悉隨從。須菩提！菩薩摩訶薩欲令諸波羅蜜度彼岸，應學深般若波羅蜜。須菩提！菩薩摩訶薩學是深般若波羅蜜者，出一切衆生之上。須菩提！於汝意云何？三千大千世界中，衆生多不？」須菩提言：「一閻浮提中，衆生尚多，何況三千大千世界！」佛告須菩提：「若三千大千世界中，衆生一時皆得人身，悉得阿耨多羅三藐三菩提，若有菩薩盡形壽供養爾所佛，衣服、飲食、臥具、湯藥，資生所須。須菩提！於汝意

云何？是人以是因緣故，得福德多不？須菩提言：「甚多甚多！」  
佛言：「不如是善男子、善女人學般若波羅蜜如說行、正憶念，得  
福多何以故？般若波羅蜜有勢力，能令菩薩摩訶薩得阿耨多羅  
三藐三菩提。須菩提！以是故，菩薩摩訶薩欲出一切衆生之上，當  
學般若波羅蜜，欲爲無救護衆生作救護，欲與無歸依衆生作歸  
依，欲與無究竟道衆生作究竟道，欲爲盲者作目，欲得佛功德，欲  
作諸佛自在遊戲，欲作佛師子，欲撞擊佛鐘鼓，欲吹佛唄，欲昇  
佛高座說法，欲斷一切衆生疑，當學深般若波羅蜜。須菩提！菩薩  
摩訶薩若學深般若波羅蜜，諸善功德無事不得。」須菩提白佛  
言：「世尊！寧復得聲聞、辟支佛功德不？」佛言：「聲聞、辟支佛功德  
皆能得，但不於中住，以智觀已，直過入菩薩位中。須菩提！菩薩摩

2901

訶薩如是學，近薩婆若，疾得阿耨多羅三藐三菩提。須菩提！菩薩  
摩訶薩如是學，爲一切世間天及人阿修羅作福田，須菩提！菩薩  
摩訶薩如是學，過諸聲聞、辟支佛福田之上，疾近薩婆若，須菩提！  
菩薩摩訶薩如是學，是名不捨不離般若波羅蜜，常行般若波羅  
蜜。須菩提！菩薩摩訶薩如是學，深般若波羅蜜，當知是不退轉菩  
薩，疾近薩婆若，遠離聲聞、辟支佛，近阿耨多羅三藐三菩提。」

「須菩提！是菩薩摩訶薩行般若波羅蜜時，若作是念：『是般若波  
羅蜜，我以是般若波羅蜜得一切種智。』若如是念，不名行般若波  
羅蜜。須菩提！若不作是念，是般若波羅蜜，是人行般若波羅蜜，是  
般若波羅蜜法，是人行般若波羅蜜，得阿耨多羅三藐三菩提，是  
名行般若波羅蜜。須菩提！若菩薩作是念：『無是般若波羅蜜，無有

2902

人有是般若波羅蜜，無有行是般若波羅蜜得阿耨多羅三藐三菩提。何以故？一切法如法性實際常住故。如是行，是爲菩薩摩訶薩行般若波羅蜜。」

**論釋曰：**上阿難問鬪諍，佛答同學清淨。今須菩提問佛，甚深同心等法，是菩薩所學處。佛答：內空乃至自相空，是名等法。有二種等忍：上品未說衆生等忍，此品說法等忍。如稱兩頭停等，如是內空等諸空，於諸法中平等。如內法有種種差別，得內空則皆平等無二，乃至自相空，一切法相皆自空，是時心則平等。菩薩住是等中，能得阿耨多羅三藐三菩提。須菩提復問：爲色等盡故，爲學薩婆若觀色等無常，念念滅不住，若得是觀，心則離色，心離色故，諸煩惱滅，煩惱滅故，得不生法。須菩提問如是學，爲學薩婆若佛反問

須菩提：於汝意云何？色等諸法如及如來如，是如爲盡滅，斷不須菩提言：不是如從本已來不集，不和合云何有盡？本來不生云何有滅？是法本來虛誑，無有定相，云何可斷？須菩提：菩薩摩訶薩能如是學，如爲學薩婆若，是如常不可證，不可滅，不可斷，是盡離斷，除顛倒故行，非是究竟。此中說究竟事，於是佛讚歎：如是學，雖不定爲一法，故而學薩婆若。若學薩婆若，即是學六波羅蜜等。若能學六波羅蜜等，是爲盡諸學邊。若盡諸學邊，是人無量福德智慧具足，故魔若魔民無能降伏。如是正學，故直到阿鞞跋致地。如是學，爲學佛所行道。如是學，皆爲十方諸佛及大菩薩諸天善人所守護。能如是學，是人無有邪見，心無所著，於一切衆生，能起大慈大悲。大慈大悲，故能教化衆生。衆生心清淨，故佛界清淨。佛界清

淨已，得佛道，三轉十二行法輪，以三乘度無量衆生，以大乘度衆生故，不斷佛種，不斷佛種故，於世間常開甘露法門，常示衆生無爲性。無爲性者，所謂如法性實際涅槃。甘露者，無爲性門者，三解脱門。下劣者，名懈怠放逸，不樂佛法，不一心行道，罪福雜行。如是等，不能學是法，何以故？是下劣者作是念：我身及親屬是我所應護，諸餘衆生何豫我事，而以頭目髓腦施之，令其得樂，一切人皆方便求樂，我今何爲捨樂求苦？或生邪見，復作是念：衆生無量無邊，度不可盡，若可度盡，即是有量有邊，一佛便可度盡。或作是念：佛說一切法空，不生不滅，我復何所度？求佛道不求佛道，同如幻夢。如是等下劣人，以種種邪見貪欲因緣故，不能學此大法。或時有大人出世，籌量思惟諸法實相，所謂非常非無常，非有邊非無

2905

邊，非有非無等。行如是道，破顛倒見，還捨此道，直入法性，常住是清淨法性中。以一切衆生不知是事故，生大悲心，然後修集六波羅蜜等諸功德，佛神通智慧，無礙解脫，得阿耨多羅三藐三菩提，以種種方便門，廣度衆生，如是人爲希有。問曰：如先說衆生無量無邊，又言衆生空，復何所度？如是云何可有所度？答曰：此是下劣人所說，何足以之爲證？復次，先所說以邪見貪欲因緣故，下劣之人作是念言：衆生有邊無邊，一切法空，無所有一切法常實，皆是六十二邪見所攝。大人無欲，思惟籌量，離如是過罪，住於法性，生大悲心。譬如大人，但以施心，施與他財而不取價，貪欲之人，求因緣而與邪見之人，依有邊無邊等，無有能無利事而有所作，譬如小人市易，求利乃與。又復大人菩薩無所求欲，能以頭目等施與

2906

衆生所得果報，亦以施與。一切法心無所依，而能集諸功德。是故佛說：欲拔一切衆生沈沒生死者，能如是學。復次，菩薩如是學者，常有慈悲憐愍心，不惱衆生故，不墮地獄；常觀因緣諸法實相，不生愚癡故，不墮畜生；常行布施，破慳貪心故，不生餓鬼中。佛所說十二部經，八萬四千法聚，常不吝惜故，不生邊地；常供養尊長善人，破憍慢故，不生旃陀羅等下賤人中；深心愛衆生，具足行利益事故，受身完具；以善法多化衆生故，眷屬成就，終不孤窮；深愛樂尸羅波羅蜜故，不行十惡道及以邪命，無有我心，但利益衆生，不自爲身故，不攝惡人及破戒者；惡人名心惡，破戒者名身口惡。復次，行三不善道名惡人，行七不善道名破戒。復次，菩薩若在家攝惡人名惡人，出家攝惡人名破戒。問曰：菩薩爲度惡人故，出現於

2907

世，譬如良醫療諸疾病，何以故不攝惡人？答曰：惡人破戒者，有可化，有不可化，此中但說不可化者。若攝取共住，則自壞其道於彼無益。譬如救溺，自不能浮，而欲濟彼，二俱不免，是故說遠離惡人。以欲界多惡，生憐愍心故，生欲界中，雖行禪，心調柔輒，以方便力故，命終時不隨禪生。如經中廣說：須菩提，菩薩如是學於一切法中，得清淨，所謂淨聲聞、辟支佛心，淨名捨離無所有畢竟空。須菩提白佛言：若一切法從本已來空清淨，云何言菩薩如是學得一切法中清淨？佛可須菩提言爲說因緣：若菩薩知一切法從本已來空清淨，於是中心不沒不卻，不沒名不疑，不生邪見，通達不與空淨，是名般若波羅蜜。一切凡夫人不知不見如是清淨法，爲是人故，行六波羅蜜等諸助道法，菩薩法應教化是衆生，是名菩薩

2908

一切法中得清淨，所謂捨三界顛倒，過聲聞、辟支佛地，一切法中得清淨智慧力，得是功德故，三世十方一切衆生心心數法，心行所起種種業因緣，悉能徧知，知已隨其所應，爲說法開化，如是等利益，皆是學般若故，得是故言盡諸學邊，少有能如是學，是人難得！佛欲令此義明了，故說譬喻，金銀及轉輪聖王業等。

復次，菩薩學是般若時，不生慳等心，不生慳等心者，菩薩學般若波羅蜜，故抑制諸煩惱，煩惱雖未盡，無所能作，是故言不生。菩薩行般若，知一切諸法相，皆虛誑不實，故是以不取色，乃至阿耨多羅三藐三菩提相，何以故？不欲令墮有無見中，故直行中道，集菩薩行。此中佛自說因緣：菩薩行般若，於一切法無所得，無所得故，無有法可取相，若善若不善等。菩薩若能如是學，總攝諸波羅蜜。

2909

檀等諸波羅蜜，不離般若波羅蜜，般若波羅蜜力故，令餘波羅蜜離諸邪見，貪著各得增長。佛欲令此義明了，故說譬喻：如我見及命根盡，問曰：我見諸見，各有別相，云何攝入我見中？答曰：雖有別相，我見是本人以無明因緣故，空五衆中生我見，生我見，故言是身死，如去不如去，若如去，則是常見，若不如去，則是斷見。若謂斷滅，現今受樂著五欲，以惡法爲最，則生見取。若謂常，出家學道，持戒苦行，則生戒取。或時見斷，常俱有過，故便言無因緣果報，則生邪見。住是五見中，世間常無常，前際後際等，生五十七見。是故說身見攝六十二見，無咎如是等種種因緣譬喻，故知般若波羅蜜諸法中最第一，般若波羅蜜諸法中最第一，故菩薩學是般若故，於衆生中第一。佛欲以是事善化衆生，故說譬喻，須菩提於汝意

2910



大智度論卷第七十八

龍樹菩薩造

姚秦三藏法師鳩摩羅什譯

釋淨願品第六十四 釋作願樂 願品

爾時釋提桓因作是念：「菩薩摩訶薩行般若波羅蜜、禪波羅蜜、毗梨耶波羅蜜、羼提波羅蜜、尸羅波羅蜜、檀波羅蜜，乃至十八不共法時，出一切衆生之上，何況得阿耨多羅三藐三菩提時！是諸衆生聞是薩婆若信者，得人中之善利，壽命中最，何況發阿耨多羅三藐三菩提意者！是衆生能發阿耨多羅三藐三菩提意者，其餘衆生應當願樂。」

爾時釋提桓因以天曼陀羅華而散佛上，發是言：「以此福德，若

有求阿耨多羅三藐三菩提者，令此人具足佛法，具足一切種智，具足自然法，若求聲聞者，令具足聲聞法。世尊，若有菩薩發阿耨多羅三藐三菩提意者，我終不生一念令其轉還，我亦不生一念令其轉還墮聲聞、辟支佛地。世尊，我願諸菩薩倍復精進於阿耨多羅三藐三菩提，見衆生生死中種種苦惱，欲利益安樂一切世間天及人阿修羅，以是心作是願：我既自度，亦當度未度者；我既自脫，當脫未脫者；我既安隱，當安未安者；我既滅度，當使未入滅度者得滅度。世尊，善男子，善女人於初發意菩薩功德隨喜心得幾許福德？於久發意菩薩功德隨喜心得幾許福德？於阿鞞跋致菩薩功德隨喜心得幾許福德？於一生補處菩薩功德隨喜心得幾許福德？」佛告釋提桓因：「儻尸迦，四天下世界可稱知斤兩，

是隨喜心福德不可稱量。復次，憍尸迦，是三千大千世界，皆可稱知斤兩，是隨喜心福德不可稱量。復次，憍尸迦，三千大千世界，滿中海水，取一髮破爲百分，以一分髮滴取海水，可知滴數，是隨喜心福德不可數知。釋提桓因白佛言：「世尊，若衆生心不隨喜阿耨多羅三藐三菩提者，皆是魔眷屬。諸心不隨喜者，從魔中來生。何以故？世尊，是諸發隨喜心菩薩，爲破魔境界故生，是故欲愛敬三尊者，應生隨喜心。隨喜已，應迴向阿耨多羅三藐三菩提，以不二不二相故。」佛言：「如是如是，憍尸迦。若有人於菩薩能如是隨喜迴向者，常值諸佛，終不見惡色，終不聞惡聲，終不嗅惡香，終不食惡味，終不觸惡觸，終不隨惡念，終不遠離諸佛，從一佛國至一佛國，親近諸佛，種善根。何以故？善男子、善女人爲無量阿僧

2915

祇初發意菩薩諸善根隨喜迴向，爲無量阿僧祇第二地、第三地，乃至第十地。一生補處諸菩薩摩訶薩善根隨喜迴向阿耨多羅三藐三菩提，以是善根因緣故，疾近阿耨多羅三藐三菩提。是諸菩薩得阿耨多羅三藐三菩提已，度無量無邊阿僧祇衆生，憍尸迦，以是因緣故，善男子、善女人於初發意菩薩善根，應隨喜迴向阿耨多羅三藐三菩提，非心非離心。於久發意阿鞞跋致，一生補處善根隨喜迴向阿耨多羅三藐三菩提，非心非離心。」須菩提白佛言：「世尊，是心如幻，云何能得阿耨多羅三藐三菩提？」佛告須菩提：「於汝意云何？汝見是心如幻不？」不也，世尊。我不見幻，亦不見心如幻。」須菩提於汝意云何？若無幻，亦無心如幻，汝見是心不？」不也，世尊。須菩提於汝意云何？離幻、離心

2916

如幻，汝見更有法得阿耨多羅三藐三菩提不？「不也！世尊！我不見離幻，離心如幻，更有法得阿耨多羅三藐三菩提。世尊！我不見更有法，何等法可說若有若無？是法相畢竟離故，不墮有，不墮無。若法畢竟離者，不能得阿耨多羅三藐三菩提，無所有法，亦不應得阿耨多羅三藐三菩提。何以故？世尊！一切法無所有，是中無垢者、無淨者。世尊！以是故，般若波羅蜜畢竟離，禪波羅蜜、毗梨耶波羅蜜、羼提波羅蜜、尸羅波羅蜜、檀波羅蜜畢竟離，乃至阿耨多羅三藐三菩提亦畢竟離。若法畢竟離，則不應修，不應壞。行般若波羅蜜亦無有法可得，畢竟離故。世尊！若般若波羅蜜畢竟離者，云何因般若波羅蜜得阿耨多羅三藐三菩提？阿耨多羅三藐三菩提亦畢竟離，二離中云何能有所得？」佛告須菩提：「善哉！善哉！

是般若波羅蜜畢竟離，禪波羅蜜、毗梨耶波羅蜜、羼提波羅蜜、尸羅波羅蜜、檀波羅蜜畢竟離，乃至一切種智畢竟離。須菩提！若般若波羅蜜畢竟離，乃至一切種智畢竟離，以是故能得阿耨多羅三藐三菩提。須菩提！若般若波羅蜜非畢竟離，乃至一切種智非畢竟離，是不名般若波羅蜜，不名禪波羅蜜，乃至一切種智。須菩提！若般若波羅蜜畢竟離，乃至一切種智畢竟離，以是故，須菩提！非不因般若波羅蜜得阿耨多羅三藐三菩提，亦不以離得離而得阿耨多羅三藐三菩提，非不因般若波羅蜜。」

須菩提白佛言：「世尊！菩薩摩訶薩所行義甚深。」佛言：「如是。須菩提！菩薩摩訶薩所行義甚深。須菩提！諸菩薩摩訶薩能為難事，所謂行是深義，而不證聲聞、辟支佛地。」須菩提白佛言：「世

尊！如我從佛聞義，菩薩摩訶薩所行不爲難，何以故？是菩薩摩訶薩不得是義可作證，亦不得般若波羅蜜作證，亦無作證者。世尊！若一切法不可得，何等是義可作證？何等是般若波羅蜜作證？何等是作證者？作證已得阿耨多羅三藐三菩提。世尊！是名菩薩摩訶薩無所得，行菩薩行，是於一切法皆得明了。世尊！若菩薩摩訶薩聞是深法，心不驚、不沒、不怖、不畏，是名爲行般若波羅蜜。是菩薩摩訶薩行般若波羅蜜時，不見我行般若波羅蜜，亦不見是般若波羅蜜，亦不見我當得阿耨多羅三藐三菩提。何以故？菩薩摩訶薩行般若波羅蜜時，不作是念：聲聞、辟支佛、地去我遠，薩婆若去我近。世尊！譬如虛空不作是念：有法去我遠，去我近。何以故？世尊！虛空無分別故。世尊！行般若波羅蜜菩薩亦不作是念：聲聞、辟

2919

支佛、地去我遠，薩婆若去我近。何以故？般若波羅蜜中無分別故。世尊！譬如幻人不作是念：幻師去我近，觀人去我遠。何以故？幻人無分別故。行般若波羅蜜菩薩不作是念：聲聞、辟支佛、地去我遠，薩婆若去我近。世尊！譬如鏡中像不作是念：所因者去我近，餘者去我遠。何以故？像無分別故。行般若波羅蜜菩薩亦不作是念：聲聞、辟支佛、地去我遠，薩婆若去我近。何以故？般若波羅蜜中無分別故。世尊！行般若波羅蜜菩薩無愛、無憎，何以故？般若波羅蜜自性不可得故。世尊！譬如佛無愛、無憎，行般若波羅蜜菩薩無愛、無憎亦如是。何以故？般若波羅蜜中無憎、無愛故。世尊！譬如佛一切分別想斷，行般若波羅蜜菩薩亦如是。一切分別想斷，畢竟空故。世尊！譬如佛所化人不作是念：聲聞、辟支佛去我遠，阿耨多羅三

2920

藐三菩提去我近。何以故。佛所化人無分別故。行般若波羅蜜菩薩亦如是。不作是念。聲聞、辟支佛去我遠。阿耨多羅三藐三菩提去我近。世尊譬如有所爲故作化。化所作事無分別。世尊般若波羅蜜亦如是。有所爲事而修。是事成就。而般若波羅蜜亦無分別。世尊譬如工匠。若工匠弟子有所爲故作木人。若男女象馬牛羊。是所作亦能有所作。是亦無分別。世尊般若波羅蜜亦如是。有所爲故。說是事成就。而般若波羅蜜亦無分別。」舍利弗問須菩提：「但般若波羅蜜無分別。禪波羅蜜乃至檀波羅蜜亦無分別。」須菩提語舍利弗：「禪波羅蜜無分別。乃至檀波羅蜜亦無分別。」舍利弗問須菩提：「色無分別。乃至識亦無分別。眼乃至意無分別。色乃至法無分別。眼識觸乃至意識觸無分別。眼觸因緣生受。

乃至意觸因緣生受。四禪。四無量心。四無色定。四念處。乃至八聖道分。空。無相。無作。佛十力。四無所畏。四無礙智。大慈大悲。十八不共法。阿耨多羅三藐三菩提。無爲性。亦無分別。須菩提。若色無分別。乃至無爲性無分別。若一切法無分別。云何分別有六道生死。是地獄。是餓鬼。是畜生。是天。是人。是阿修羅。云何分別。是須陀洹。斯陀含。阿那含。阿羅漢。辟支佛。諸佛。」須菩提報舍利弗：「衆生顛倒因緣故。造作身口意業。隨欲本業報。受六道身。地獄。餓鬼。畜生。人。天。阿修羅身。如汝言。云何分別有須陀洹。乃至佛道。舍利弗。須陀洹即是無分別故。有須陀洹果亦是無分別故。有乃至阿羅漢。阿羅漢果。辟支佛。辟支佛道。佛。佛道亦是無分別故。有舍利弗。過去諸佛亦是無分別。斷分別故。有以是故。舍利弗。當知一切法。

無有分別不壞相，諸法如法性實際故。舍利弗如是菩薩摩訶薩應行無分別般若波羅蜜，行無分別般若波羅蜜已，便得無分別阿耨多羅三藐三菩提。」

【論釋曰：是時，釋提桓因及會中人皆共歡喜。釋提桓因作是念：是菩薩行菩薩道時，所有功德尚勝一切衆生，何況成阿耨多羅三藐三菩提！衆生有二種：一者發心，二者未發心。發心菩薩勝一切未發心者，所以者何？是人種無量無上佛法因緣，欲度一切衆生，令離苦得樂，其餘衆生但自求樂，欲與他苦，如是等因緣故，發心者勝。問曰：諸阿羅漢、辟支佛及五通，是離欲人，發心者或有未離欲，但發心，云何得勝？答曰：是事先品中已種種答阿羅漢等，雖漏盡，不如初發心菩薩。譬如轉輪聖王太子，雖在胎中，已勝餘子。又

如國王太子，雖未即位，勝諸大臣有位富貴者。發心菩薩有二種：一者行諸波羅蜜等菩薩道，二者但密發心。此中說行菩薩道者，是人雖事未成就，能勝一切衆生，何況成就！如歌羅頻伽鳥在穀中，未發聲已能勝諸鳥，何況成就！菩薩亦如是，雖未成佛，行菩薩道，說諸法實相，音聲破諸外道及魔民戲論，何況成佛！有人言：若有能一發心言，我當作佛，滅一切衆生苦，雖未斷煩惱，未行難事，以心口業重故，勝於一切衆生。一切衆生皆自求樂，自爲身故，愛其所親。阿羅漢、辟支佛，雖不貪世樂，自爲滅苦故，求涅槃樂，不能爲衆生。菩薩心生口言爲度一切，是故勝。譬如一六神通阿羅漢，將一沙彌令負衣鉢，循路而行。沙彌思惟：我當以何乘入涅槃？即發心佛爲世尊，最上最妙，我當以佛乘入涅槃。師知其念，即取衣

鉢自擔，推沙彌在前行。沙彌覆復思惟佛道甚難，久住生死受無量苦，且以小乘早入涅槃。師復以衣鉢囊還與沙彌令擔，語在後行。如是至三，沙彌白師：師年老耄，狀如小兒戲，方始令我在前，已復令我在後，何其太速。師答汝：初念發心作佛，是心貴重，則住我師道中。如是，人諸辟支佛尚應供養，何況阿羅漢。以是故，推汝在前。汝心還悔，欲取小乘而未使得，汝去我懸遠，是故令汝在後。沙彌聞已驚悟，我師能知我心，我一發意已勝阿羅漢，何況成就。即自堅固住大乘法。復次，勝名不必一切事中皆勝，但以一發心欲作佛度衆生，是事爲勝。諸餘禪定解脫等，猶尚未有何得言勝。譬如以飛言之鳥則勝人，未來當得功德，此事不論。小乘人言乃至補處菩薩尚不勝小沙彌得無量律儀者。摩訶衍論中，或有人如

2925

是言其有發大乘心者，雖復在弊惡小人中，猶勝二乘得解脫者。是名二邊離，是二邊名爲中道。中道義如上說，以其有義理實故，應當取。是故說初發心時勝一切衆生，何況成佛聞薩婆若信者，得人中善利。有人言：六波羅蜜是利。有人言：六波羅蜜果報是利。所謂轉輪王、釋梵天王、人王、法王等。有人言：得阿鞞跋致不墮惡道，常生人天富貴處。有人言：菩薩住於果報神通遊至十方，供養諸佛，種種方便教化衆生，信受因緣，教化衆生得如是等大利。壽命中最者，衆生有二種命：一者命根，二者智慧命。是人得智慧命故，說壽命中最。何況發心，發心者可敬可貴。所以者何？如先說因緣，能捨自樂與他樂，不自憂苦憂他人苦故。

爾時釋提桓因欲現歡喜相，以天曼陀羅華散佛上，如經廣說。問

2926

曰：罪福不可以與人，雖欲與亦不得。釋提桓因何以故以此福德令求佛道者具足佛法？答曰：雖不可與人，然自令心好。又是釋提桓因顯此不著福，是故以隨喜心與求佛道者，與聲聞人亦爾。釋提桓因白佛：我雖得聲聞道，亦不生一念令菩薩轉還向二乘心。所以者何？諸菩薩見衆生在生死中有種種苦，欲利益一切世間，故作是願，未度者我當度等。爾時會中衆生有作是念，若如上說，隨喜有功德，初發心人隨喜，於久發心人隨喜，有何差別？釋提桓因欲解衆人疑，故問佛言：世尊，於初發心菩薩功德隨喜得幾許福德？如經廣說，是福德無量無邊，以種無量無邊田中，人不能數知，故說譬喻令解。如經中廣說，隨喜之德雖無量無邊，於近佛道者隨喜福德轉多。是時帝釋歡喜，故白佛言：世尊，有聞是功德不

隨喜者，則是魔民，從魔天來。所以者何？在魔境界，積集惡心，故不隨喜。此中說因緣：隨喜心能破魔界，是故求佛道者，欲愛敬三尊，不捨者，當以隨喜心迴向阿耨多羅三藐三菩提。不一不二相者，不見諸法有一定相不屬因緣者，故言不一不分別。隨喜心迴向心，是名不二畢竟空故。佛可帝釋意已，更稱說隨喜功德。是人常憶念十方諸佛功德隨喜，故疾得見佛。又以深心於一切衆生欲令離苦得樂，是故往來生死六情初不受惡塵，終不離生諸佛前，以不斷種見佛行故。此中佛自說因緣：是人於無央數阿僧祇初發心菩薩，乃至無量一生補處菩薩，皆隨喜，故得如上果報，疾成佛道，度無量阿僧祇衆生。復次，憍尸迦，是菩薩因是福德，如諸法實相迴向於實相中心不可得，是故說非心亦不離心。如上說不

一不二義，以事異故更說。

須菩提聞已，取是空無有心相難佛。是心非心空無所有如幻，云何能得阿耨多羅三藐三菩提？佛反問須菩提：汝見是空心定相如幻？不須菩提作是念：心若空如幻，云何可見？若可見則非空，是故答言不也。佛言：心若空無所有，汝見是中有是？若有若無戲論不？答言不也。離是空無所有如幻心，汝見更有法能得無上道不？答言不見。不見不可得故，何有法若有若無？一切諸法畢竟離故，畢竟空故，不墮有不墮無。若法不墮有無中，是則畢竟無所有，不應得無上道。以是因緣故，般若波羅蜜畢竟離相，見有無二俱過故。禪波羅蜜乃至阿耨多羅三藐三菩提，亦如是畢竟離相。若法畢竟離，則不可得見，不可得修，不可得斷，不可得證。行是法則更

無所得，畢竟離故。世尊！今般若波羅蜜畢竟離，阿耨多羅三藐三菩提畢竟離，云何以畢竟離得畢竟離？若一法畢竟離，尚不應有所得，何況二離？譬如以指觸虛空，虛空無觸，故指不能觸，何況二皆無觸？亦如虛空涅槃，般若波羅蜜畢竟離，阿耨多羅三藐三菩提畢竟離，云何用離得離？佛知須菩提隨諸法實相說，故可其言：善哉！善哉！即說因緣：須菩提！若般若波羅蜜畢竟離，阿耨多羅三藐三菩提畢竟離，以是因緣故可得。何以故？若一法定有相非空者，則是常法不生相，從未來至現在，從現在至過去。若無實生相，則無滅相；若無生滅，則無四諦；若無四諦，則無法寶；法寶無故，亦無阿耨多羅三藐三菩提。法寶即是阿耨多羅三藐三菩提故。若無法寶，則無佛寶；若無佛法，則無僧寶；若無三寶，則無一切諸法。

有如是等過罪故。畢竟離相，則通達無礙。若說畢竟離，當知亦離空。若不離空，不名畢竟離。是故經說言般若波羅蜜畢竟離故，能得阿耨多羅三藐三菩提，雖不離般若波羅蜜得阿耨多羅三藐三菩提，亦不以二離而得二離，畢竟空故，不應難。

須菩提知佛所說甚深相，是故白佛言若菩薩能如是行，則是行甚深義。佛可其言，是菩薩能為難事，能行如是甚深義，而不證二乘。所以者何？是菩薩一心以利智深入空而不證涅槃，是則為難。須菩提言如我解佛所說義，是不為難。何以故？是人不得是甚深義，一定相可作證，不得般若波羅蜜，不得證者，誰當以甚深義為證？若不證是甚深義，誰當得阿耨多羅三藐三菩提？是名菩薩無所得行，行是道則照明一切法。問曰佛說言難，須菩提言不難，師

弟子義應同，何以各相違背？答曰佛以世諦故說，須菩提以第一義諦故說。佛說菩薩得是甚深義，須菩提說菩薩亦不得是甚深義。佛以須菩提為眾生故說，有人聞難事則發心，故說難事；有人聞難事而廢退，故說無難。是名菩薩無所得行，住是行中，於一切法通達無礙。須菩提言若菩薩聞如是說畢竟離，無法可證，無取證者，亦無般若及阿耨多羅三藐三菩提，是時不驚不沒，通達無礙者，是名行般若波羅蜜。行般若波羅蜜者，是名真行深行。何以故？是菩薩不見般若波羅蜜，亦不見我行般若波羅蜜，不見阿耨多羅三藐三菩提，亦不見是法可得阿耨多羅三藐三菩提，都無所分別。是菩薩安住一切諸法實相中，故不作是分別。言二乘離我遠，佛道離我近。此中說虛空等譬喻，此諸譬喻為明了畢竟空

義故般若波羅蜜雖空若有所修能成其事乃至如木人隨作何事皆能成就舍利弗問須菩提但般若無分別諸波羅蜜亦無分別若但般若空無分別餘波羅蜜應是有相是則菩薩道有別異不平等又初品中說行檀波羅蜜時無施者受者亦無財物今云何言別若五事皆空則無分別無有六名亦無可修行須菩提言五波羅蜜亦空無有分別初發心未得無生法忍者有分別譬如四河未會大海則有別名既入大海則無差別菩薩亦如是世俗諦中有差別第一義諦則無分別舍利弗問色乃至阿耨多羅三藐三菩提及無爲性亦無分別若此法空無差別云何有六道別異云何有分別須陀洹乃至佛道須菩提答舍利弗諸法雖畢竟空無分別而是衆生狂顛倒心而起身口意業隨業受身業報貪

欲是本但爲欲所逼而生著心諸法無有定相業果報者所謂六道以是故知空無所分別是其實本但以顛倒不實故有六道差別又須陀洹等賢聖亦因畢竟空無分別法生所謂斷三結法名須陀洹果三結使即是顛倒覺顛倒除卻名爲斷是故斷法即是空無有分別世諦故假名人得是法故名須陀洹是故當知須陀洹人及果畢竟空無分別乃至佛佛道亦如是此中說因緣非但現在無分別過去如恆河沙諸佛一切分別斷故入無餘涅槃無有少許法定相可分別一切法畢竟空入是如法性實際門故是故言因緣法甚深入是三門故菩薩應如是行無分別般若波羅蜜行無分別般若波羅蜜故得無分別法所謂阿耨多羅三藐三菩提。

釋度空品第六十五之上

經舍利弗語須菩提：「菩薩摩訶薩行般若波羅蜜，爲行真實法，爲行無真實法。」須菩提報舍利弗：「菩薩摩訶薩行般若波羅蜜，行無真實法，何以故？是般若波羅蜜無真實，乃至一切種智無真實。故菩薩摩訶薩行般若波羅蜜，無真實不可得，何況真實！乃至行一切種智，無真實法不可得，何況真實法！」爾時，欲色界諸天子作是念：「諸有善男子、善女人，發阿耨多羅三藐三菩提意，如深般若波羅蜜所說義，行於等法，不作實際證，不墮聲聞、辟支佛地，應當爲作禮！」須菩提語諸天子：「諸菩薩摩訶薩於等法，不證聲聞、辟支佛地，不爲難。諸菩薩摩訶薩大莊嚴，我當度無量無邊阿僧祇衆生，知衆生畢竟不可得而度衆生，是乃爲難。諸天

2935

子！諸菩薩摩訶薩發阿耨多羅三藐三菩提心，作是願：我當度一切衆生，衆生實不可得，是人欲度衆生，如欲度虛空，何以故？虛空離故，當知衆生亦離。虛空空故，當知衆生亦空。虛空無堅固，當知衆生亦無堅固。虛空虛誑，當知衆生亦虛誑。諸天子！以是因緣，故當知菩薩所作為難。爲利益無所有衆生，故大莊嚴，是人爲衆生結誓，爲欲與虛空共鬪，是菩薩結誓已，亦不得衆生而爲衆生結誓，何以故？衆生離故，當知大誓亦離。衆生虛誑，故當知大誓亦虛誑。若菩薩摩訶薩聞是法，心不驚、不沒，當知是菩薩摩訶薩行般若波羅蜜。何以故？色離，即是衆生離。受、想、行、識離，即是衆生離。色離，即是六波羅蜜離。受、想、行、識離，即是六波羅蜜離。乃至一切種智離，即是六波羅蜜離。若菩薩摩訶薩聞是一切諸法離相，心

2936

不驚、不沒、不怖、不畏、當知是菩薩摩訶薩行般若波羅蜜。」佛告須菩提：「何因緣故，菩薩摩訶薩於深般若波羅蜜中心不沒？」須菩提白佛言：「世尊！般若波羅蜜無所有故不沒，般若波羅蜜離故不沒，般若波羅蜜寂滅故不沒。世尊！以是因緣故，菩薩於深般若波羅蜜中心不沒。何以故？是菩薩不得沒者，不得沒事，不得沒處，是一切法皆不可得故。世尊！若菩薩摩訶薩聞是法，心不驚、不沒、不怖、不畏，當知是菩薩為行般若波羅蜜。何以故？沒者沒事，沒處是法皆不可得故。菩薩摩訶薩如是行般若波羅蜜，諸天及釋提桓因天、梵天王天及世界主天皆為作禮。」佛告須菩提：「不但釋提桓因諸天、梵王及諸天、世界主及諸天禮是菩薩摩訶薩行般若波羅蜜者，過是上光音天、徧淨天、廣果天、淨居天皆為是

2937

菩薩摩訶薩作禮。須菩提！今現在十方無量諸佛，亦念是行般若波羅蜜。菩薩摩訶薩當知是菩薩為如佛。須菩提！若恆河沙等世界中衆生悉使為魔，是一一魔復化作魔，如恆河沙等魔，是一切魔不能留難菩薩行般若波羅蜜。」

【論釋曰：爾時舍利弗聞上無分別相法，心大歡喜，問須菩提：若菩薩行般若波羅蜜，為行真實法，為行無真實法？真實者，審定不變異，即是可取、可著；若不真實，即是虛誑妄語。須菩提常樂行深空，心無障礙，故答行般若者，即是行無真實。何以故？般若波羅蜜空，無定相，無分別故。乃至一切種智亦如是。菩薩行如是般若波羅蜜時，先來生死中所習所著虛誑有為法，尚不可得，何況後來觀虛誑因緣生般若波羅蜜，非所著法而可得？是故菩薩觀一切世

2938

間不真實，亦不著是般若波羅蜜。世諦故說真實，第一義中真實不可得，何況不真實！爾時，欲色界諸天子歡喜言：其有發菩薩心者，皆應禮敬，能為難事，能行第一深義而不作證。故第一義即是平等法，但以異名說。須菩提語諸天子：菩薩於平等法不作證，不為難。菩薩欲度無量眾生，眾生畢竟不可得，是則為難。何以故？欲度眾生者，為欲度虛空虛空離故，眾生亦離，虛空虛誑不實，故眾生亦空虛誑不實。問曰：於平等法而不證，眾生畢竟空而度眾生，此二俱畢竟空，云何言一難一不難？答曰：眾生虛誑假名，故是所著處，平等法無為故，非所著處。眾生從有為法假名而生，無為法是第一義，於顛倒著處而能不著為難，於無著處不著，是不為難。以是故，如是說，眾生空故，大莊嚴亦空，若大莊嚴空而能發心為

2939

難。菩薩若聞是第一平等義，度眾生大莊嚴皆畢竟空，而心不驚不沒。譬如調馬，自見影不驚。何以故？自知影從身出故。菩薩亦如是，知畢竟空，因有為和合虛妄法生故。菩薩聞是事，不驚不沒，是為行般若波羅蜜。色等法離故，眾生亦離，離名為空。若眾生空，法不空，應有怖畏。若法亦空，無生怖畏處。若菩薩聞是一切法離相，心不畏，是亦名菩薩行般若波羅蜜。上聞眾生空故不畏，今聞法空故不畏。若聞是二空不畏，是為真行般若。佛問須菩提，何以故菩薩心不沒者？問曰：佛是一切智人，何以問弟子心不驚不沒？答曰：以眾會有疑，敬難故不敢問，是以佛問。復次，是第一平等義甚深難得，深處應當沒而不沒，故試問須菩提。復次，佛以須菩提為說法主，聽者法應問難。問曰：佛為一切智，何以不自為說主，而令

2940

須菩提說。答曰：衆中有人以佛智慧無量無邊，我等智力有量，若心有所疑，不敢發問，爲是人故，命須菩提說。問曰：若爾者，何以不令大菩薩說？答曰：大菩薩智慧亦大，不可思議，威德重故，亦不敢問難。復次，有人言：阿羅漢、辟支佛、佛，三界繫無明永盡，無餘故，能如實說法，諸菩薩雖廣集福德，漏未盡故，或不可信，是故不命。問曰：若爾者，舍利弗智慧第一，及餘大弟子，何以不命？答曰：是事先已答，所謂須菩提樂於空行，偏善說空，般若波羅蜜多說空故，令須菩提說。須菩提白佛：一切法畢竟空，無所有，無所有故，自相離，離相故，常寂滅，常寂滅故，無憶想分別，是故菩薩不應驚，不應沒，沒者，沒處，沒法，皆不可得。若菩薩聞是事，不驚，不沒，是爲行般若波羅蜜。須菩提答已，白佛言：能如是行，亦名爲行般若波羅蜜。世

尊菩薩能如是行，一切諸天帝釋及世界主，禮菩薩者，地神、虛空中神、四天王、忉利天帝釋爲主，皆共禮是菩薩。梵天王，初禪中梵世界衆生主，世界主者，欲界餘天主，衆生多信有此天故，須菩提說言作禮。何以故？是菩薩捨自樂，欲利益衆生，是三種天，但自求樂故。佛語須菩提：非但是三種天作禮，光音天等，清淨一心諸天，皆亦作禮。欲界諸天，著淫欲心多，故禮不足爲貴。初禪有覺觀散亂，亦不足爲妙。上諸天心清淨，以菩薩有大功德，故禮，爾乃爲難。須菩提：菩薩若能如是行般若，爲十方無量諸佛所念。佛念因緣，如先說。今佛說：是菩薩諸佛念果報，所謂當知是菩薩爲如佛，以其必至佛道不退故。所以者何？如恆河沙等魔，不能壞是菩薩。如經廣說。

大智度論卷第七十八

大智度論卷第七十九

龍樹菩薩造

姚秦三藏法師鳩摩羅什譯

釋度空品第六十五之下

經「須菩提！菩薩摩訶薩成就二法，魔不能壞。何等二？觀一切法空，不捨一切衆生。須菩提！菩薩成就此二法，魔不能壞。復次，須菩提！菩薩摩訶薩復有二法成就，魔不能壞。何等二？所作如所言，亦爲諸佛所念。菩薩成就此二法，魔不能壞。須菩提！菩薩如是行，是諸天皆來到菩薩所，親近諮問，勸喻安慰，作是言：善男子！汝疾得阿耨多羅三藐三菩提不久。善男子！汝常當行是空無相、無作行。何以故？善男子！汝行是行，無護衆生，汝爲作護，無依衆生爲作依，

2943

大智度論卷七十九 釋度空品第六十五之下

大智度論卷七十九 釋度空品第六十五之下

無救衆生爲作救，無究竟道衆生爲作究竟道，無歸衆生爲作歸，無洲衆生爲作洲，冥者爲作明，盲者爲作眼。何以故？是菩薩摩訶薩行般若波羅蜜，十方現在無量阿僧祇諸佛在大衆中說法時，自讚歎稱揚是菩薩摩訶薩名姓，言某甲菩薩成就般若波羅蜜功德。須菩提！如我今說法時，自稱揚寶相菩薩、尸棄菩薩。復有諸菩薩摩訶薩在阿閼佛世界中行般若波羅蜜，淨修梵行，我亦稱揚是菩薩名姓。須菩提！亦如東方現在諸佛說法時，是中有菩薩摩訶薩淨修梵行，佛亦歡喜，自稱揚讚歎是菩薩。南西北方、四維、上下，亦如是。復有菩薩從初發意欲具足佛道，乃至得一切種智，諸佛說法時，亦歡喜自稱揚讚歎是菩薩。何以故？是諸菩薩摩訶薩所行甚難，不斷佛種行。」須菩提白佛言：「世尊！何等菩薩摩

2944

訶薩諸佛說法時，自讚歎稱揚。」佛告須菩提：「阿鞞跋致菩薩，諸佛說法時，自讚歎稱揚。」須菩提言：「何等阿鞞跋致菩薩爲佛所讚？」佛言：「如阿闍佛爲菩薩時所行所學，諸菩薩亦如是學。是諸阿鞞跋致菩薩，諸佛說法時，歡喜讚歎。復次，須菩提！有菩薩行般若波羅蜜，信解一切法無生，未得無生忍法；信解一切法空，未得無生忍法；信解一切法虛誑，不實不堅固，未得無生忍法。須菩提！如是等諸菩薩摩訶薩，佛說法時，歡喜自讚歎稱揚名姓。須菩提！若諸菩薩摩訶薩，諸佛說法，歡喜自讚歎者，是菩薩滅聲聞、辟支佛地，當得阿耨多羅三藐三菩提。須菩提！若菩薩摩訶薩，諸佛說法時，歡喜自讚歎者，是菩薩當住阿鞞跋致地，住是地已，當得薩婆若。復次，須菩提！菩薩摩訶薩聞是深般若波羅蜜，其

心明利，不疑不悔。作是念是事如佛所說。是菩薩亦當於阿闍佛及諸菩薩所廣聞是般若波羅蜜，亦信解。信解已如佛所說，當住阿鞞跋致地。如是須菩提！但聞般若波羅蜜，得大利益，何況信解！信解已如說住，如說行，如說住，行已住一切種智中。」須菩提白佛言：「世尊！若佛說菩薩摩訶薩如所說住，如所說行，住薩婆若；菩薩摩訶薩無所得法，云何住薩婆若？」佛告須菩提：「菩薩摩訶薩住諸法如中住薩婆若。」須菩提言：「世尊！除如更無法可得，誰住如中？住如中已，當得阿耨多羅三藐三菩提。誰住如中當說法如？尚不可得，何況住如得阿耨多羅三藐三菩提？誰住如中而說法無有是處？」佛告須菩提：「如汝所說，除如更無法，誰住如中？住如中已，當得阿耨多羅三藐三菩提。誰住如中當說法如？尚

不可得，何況住如得阿耨多羅三藐三菩提！誰住如中而說法？無有是處！佛言：「如是如是須菩提，除如更無有法可得，誰住如中？住如中已當得阿耨多羅三藐三菩提，誰住如中當說法？如尚不可得，何況住如中得阿耨多羅三藐三菩提！誰住如中而說法？何以故？是如生不可得，滅不可得，住異不可得，若法生滅住異不可得，是中誰當住如？誰當住如已得阿耨多羅三藐三菩提，誰當住如而說法，無有是處！」釋提桓因白佛言：「世尊，諸菩薩摩訶薩所爲甚難，深般若波羅蜜中欲得阿耨多羅三藐三菩提，何以故？世尊，無有如中住者，亦無當得阿耨多羅三藐三菩提者，亦無說法者。菩薩摩訶薩於是處心不驚、不沒、不怖、不畏、不疑、不悔。」爾時，須菩提語釋提桓因：「汝憍尸迦，說菩薩摩訶薩所爲甚難，

2947

是甚深法中心不驚、不沒、不怖、不畏、不疑、不悔。憍尸迦，諸法空中誰驚、誰沒、誰怖、誰畏、誰疑、誰悔？」是時釋提桓因語須菩提：「須菩提所說，但爲空事，無所罣礙，譬如仰射空中箭去無礙，須菩提說法無礙亦如是。」

**論釋**曰：衆會疑菩薩何因緣故得如是力，魔不能壞。佛答有二因緣，故魔不能壞。一者觀諸法空，二者不捨一切衆生。以日月因緣故，萬物潤生；但有月而無日，則萬物溼壞；但有日而無月，則萬物焦爛。日月和合故，萬物成熟。菩薩亦如是，有二道：二者悲，二者空。悲心憐愍衆生，誓願欲度；空心來則滅憐愍心。若但有憐愍心，無智慧，則心沒在無衆生而有衆生顛倒中；若但有空心，捨憐愍度衆生心，則墮斷滅中。是故佛說二事兼用，雖觀一切空而不捨衆

2948

生，雖憐愍衆生不捨一切空。觀一切法空空亦空故不著空，是故不妨憐愍衆生。觀憐愍衆生亦不著衆生，不取衆生相。但憐愍衆生，引導入空，是故雖行憐愍而不妨空。雖行空亦不取空相，故不妨憐愍。心如日月相須。諸神天輕賤妄語人，若菩薩不如所說行，則五種執金剛神捨離不復守護，惡鬼得便。是人喜生惡心，惡心故則生惡業，生惡業故則墮惡道。菩薩不爲諸佛所念者，則善根朽壞，如魚子不爲母念則爛壞不生。是故言所作如所言亦爲諸佛所念。得此二法故不可破壞。若菩薩能如是真行般若波羅蜜，魔不能壞，功德智慧增益諸天，則來親近諮問、安慰勸喻。作是言：善男子，汝疾得阿耨多羅三藐三菩提不久。以是因緣故，常行空行。問曰：諸天未得一切智，云何能與菩薩授記？答曰：諸天長壽，從

過去諸佛聞如是行得記，今見菩薩有如是行故說，見因知有果。故諸天見是菩薩行三解脫門印，亦兼行慈悲心於衆生，是故說言不久作佛。無守護衆生汝爲作守護，無歸與作歸等義，如先說。若菩薩能如是行甚深般若波羅蜜，十方現在無量諸佛說法時，稱揚讚歎是名字者，如我今稱揚寶相菩薩、尸棄菩薩及阿閼佛世界中菩薩。又如十方佛說法時，稱揚諸妙行菩薩。菩薩能如所說應諸法實相者，十方諸佛說法時，亦以是菩薩爲譬喻。作是言：某方某世界菩薩雖未作佛，能如是行甚深般若波羅蜜，功德希有故。如大國王有大將，不惜身命，有方便能破怨敵，常爲國王所稱譽。菩薩亦如是，觀畢竟空，不惜我身，破煩惱賊，有方便而不作證，教化衆生，諸佛所稱譽。諸佛雖無著心，無分別善不善法，視諸

阿羅漢、外道亦無憎、無愛、爲利益衆生故、讚歎善人、稱揚善法、毀訾不善。所以者何？欲使衆生依附好人心隨善法、令出世間故。問曰：何經中說二菩薩佛所讚歎？答曰：佛經無量、佛涅槃後、諸惡邪見王出、焚燒經法、破壞塔寺、害諸沙門、五百歲後、像法不淨、諸阿羅漢、神通菩薩難可得見、故諸深經不盡在閻浮提、行者受者少、故諸天龍神持去。問曰：如徧吉菩薩、觀世音菩薩、大力勢菩薩、文殊師利、彌勒菩薩等、何以不讚歎而但稱譽二菩薩？答曰：是二菩薩未得無生忍法、而能似無生忍法行、必有此事、一切魔民所不能壞、是故佛歎希有。復次、是二菩薩清淨大願行、深大慈悲心、不期疾作佛、爲度衆生故、有如是等功德、故佛稱讚。復次、徧吉、觀世音菩薩等功德極大、人皆知、是二菩薩人未知、故稱揚。阿闍佛世

界菩薩皆效阿闍佛、從初發心來、行清淨不雜行、生彼菩薩皆效其行、是故說阿闍佛世界菩薩稱譽其德。又如十方諸佛亦稱揚諸世界上妙菩薩、亦如釋迦文尼佛稱揚二菩薩、何等是菩薩從初發意乃至十地、佛說是菩薩所爲甚難、能不斷佛種。此中須菩提問：何等菩薩、佛說法時、稱揚讚歎、說其名字？問曰：佛已先說、須菩提何以更問？答曰：佛初說大菩薩、後稱說一切菩薩、從初發意乃至十地、是故須菩提疑問佛、佛讚歎何等菩薩、稱其名字。佛答：佛雖皆愛念一切菩薩、其中有德行勝者、稱歎其名字。何等菩薩佛所讚歎？如阿闍佛初發心時、行清淨行、不休不息、乃至阿耨多羅三藐三菩提、如是等菩薩、佛所讚歎。復次、有菩薩未得無生忍法、未入菩薩位、行般若波羅蜜力、故常思惟籌量、求諸法實相、能

信解忍通一切法無生相空，虛誑不堅固。有如是等相諸菩薩摩訶薩，佛稱名讚歎。虛誑不實，不堅固者，皆是無常、苦、無我門。一切法空者，即是空門；一切法無生者，即是諸法實相，滅諸觀。復次，虛誑不實，不堅固，即是無作解脫門；一切法空，即是空解脫門；一切法無生，即是無相解脫門。如是等三種差別，是人出柔順法忍，未得無生法忍，出凡夫法，未入聖法，而能信受聖法，似得聖法人，是故希有。如佛所稱譽阿鞞跋致菩薩，能斷二地，得受記，是人為佛所稱譽，亦如是。如是相人，雖未得無生法忍，智慧力故，為諸佛稱名讚歎。今以信根力勝故，佛亦稱名讚歎，何者是？所謂復次，須菩提！若菩薩摩訶薩聞是深般若，其心明利，不疑、不悔、作是念：是事如佛所說。問曰：是菩薩已信解般若波羅蜜，何以更從阿闍佛及

2953

諸菩薩邊聞。答曰：是人聞阿闍佛作菩薩時所行清淨，是人聞已，欲效阿闍佛所行，是故佛說此人於是有信力，於彼得智慧力，故當住阿鞞跋致地。是人未得無生忍法，以智慧力，故得如是阿鞞跋致，為諸佛所讚。有以信力，故得如阿鞞跋致，為諸佛所讚。若但聞般若，得如是利益，何況信受如所說行，漸住一切種智中！須菩提問佛：一切法空相無所得，云何菩薩住薩婆若？佛言：如中住。如者即是空菩薩住，是畢竟空中，名為住薩婆若。此中須菩提問佛：除如更無法可得，誰住如中，乃至無有是處，如經廣說。佛可須菩提所語說如亦空因緣，所謂是如生滅住異不可得。若法無三相，即是畢竟空，云何可住？若住此中，得阿耨多羅三藐三菩提而說法，無有是處。釋提桓因欲取般若一定相，聞佛共須菩提說無相

2954

亦不可得，是故白佛言：希有！世尊！是般若甚深，是菩薩所爲甚難，欲得阿耨多羅三藐三菩提。何以故？是如畢竟空，除如更無菩薩住，是如中得阿耨多羅三藐三菩提，亦無定法名爲佛說法者，所度衆生亦不離如，亦無拔出安處涅槃，諸法常住如相故。菩薩聞是事，心不疑悔，是事爲難，雖信一切法畢竟空，而求阿耨多羅三藐三菩提，精進不休不息，是爲難。須菩提語帝釋：若諸法畢竟空，無所有，疑何從生？何有難事？帝釋心歡喜，作是念：須菩提實是樂說空法，須菩提有所解說，皆說空事。雖說色等餘事，其義皆趣向空，若有難問，不能作礙，空亦空故。若人難空，須菩提先已破空，於有無中都無所礙，譬如仰射空中，虛空即是畢竟空，箭是須菩提智慧，所說如箭於空無礙，勢盡自墮，非爲空盡，須菩提說法因緣。

2955

事辦，故便止，非爲法盡。若有人雖有利箭，射壁不能過，人雖有利智慧，邪見著，有則礙而不通，是故須菩提說無障無礙法。

### 釋囑累品第六十六

爾時，釋提桓因白佛言：「世尊！我如是說，如是答，爲隨順法，不爲正答不？」佛告釋提桓因言：「憍尸迦！汝所說所答，實皆隨順。」釋提桓因言：「希有！世尊！須菩提所樂說，皆是爲空、爲無相、無作、爲四念處，乃至爲阿耨多羅三藐三菩提。」佛告釋提桓因：「須菩提比丘，行空時，檀波羅蜜不可得，何況行檀波羅蜜者，乃至般若波羅蜜不可得，何況行般若波羅蜜者；四念處不可得，何況修四念處者；乃至八聖道分不可得，何況修八聖道分者；禪、解脫、三昧、定不可得，何況修禪、解脫、三昧、定者；佛十力不可得，何況修佛

2956

十力者！四無所畏不可得，何況能生四無所畏者！四無礙智不可得，何況生四無礙智者！大慈大悲不可得，何況行大慈大悲者！十八不共法不可得，何況生十八不共法者！阿耨多羅三藐三菩提不可得，何況得阿耨多羅三藐三菩提者！一切智不可得，何況得一切智者！如來不可得，何況當作如來者！無生法不可得，何況無生法作證者！三十二相不可得，何況得三十二相者！八十隨形好不可得，何況得八十隨形好者！何以故？憍尸迦！須菩提比丘一切法離行，一切法無所得行，一切法空行，一切法無相行，一切法無作行。憍尸迦！是爲須菩提比丘所行，欲比菩薩摩訶薩般若波羅蜜行百分不及一，千分千萬億分，乃至算數譬喻所不能及。何以故？除佛行，是菩薩摩訶薩行般若波羅蜜，於聲聞、辟支佛諸行中，

2957

最尊、最妙、最上。以是故，菩薩摩訶薩欲得於一切衆生中最上，當行是般若波羅蜜行。何以故？憍尸迦！諸菩薩摩訶薩行般若波羅蜜時，過聲聞、辟支佛地，入菩薩位，能具足佛法，得一切種智，斷一切煩惱習，作佛。」

是會中諸三十三天，以天曼陀羅華散佛及僧。是時，八百比丘從座起，以華散佛，偏袒右肩，合掌右膝著地，白佛言：「世尊！我等當行是無上行，聲聞、辟支佛所不能行。」爾時，佛知諸比丘心行，便微笑。如諸佛法種種色光青黃赤白紅縹，從佛口中出，徧照三千大千世界，繞佛三匝，還從頂入。爾時，阿難偏袒右肩，右膝著地，白佛言：「世尊！何因緣故微笑？諸佛不以無因緣而笑。」佛告阿難：「是八百比丘於星宿劫中當得阿耨多羅三藐三菩提，佛名散

2958

華皆同一字，比丘僧、世界、壽命皆等。各各過十萬歲，出家作佛。是時，諸世界常雨五色天華。以是故，阿難菩薩摩訶薩欲行最上行，應當行般若波羅蜜。佛告阿難：「若有善男子、善女人能行是深般若波羅蜜，當知是菩薩人中死，此間生，若兜率天上死，來生此間，若人中，若兜率天上，廣聞是深般若波羅蜜。阿難！我見是諸菩薩摩訶薩能行是深般若波羅蜜。阿難！若有善男子、善女人聞是深般若波羅蜜，受持讀誦，親近正憶念，轉復以般若波羅蜜教行菩薩道者，當知是菩薩面從佛聞深般若波羅蜜，乃至親近，亦從諸佛所種善根。善男子、善女人當作是念：我等非聲聞所種善根，亦不從聲聞所聞是深般若波羅蜜。阿難！若有善男子、善女人受持是深般若波羅蜜，讀誦親近，隨義隨法行，當知是善男子、善

2959

女人則爲面見佛。阿難！若有善男子、善女人聞是深般若波羅蜜，信心清淨，不可沮壞，當知是善男子、善女人曾供養佛，種善根，與善知識相得。阿難！於諸佛福田種善根，雖不虛誑，要得聲聞、辟支佛、佛而得解脫，應當深了了行六波羅蜜，乃至一切種智。阿難！若菩薩深了了行六波羅蜜，乃至一切種智，是人若住聲聞、辟支佛道，不得阿耨多羅三藐三菩提，無有是處。

「是故，阿難！我以般若波羅蜜囑累汝。阿難！汝若受持一切法，除般若波羅蜜，若忘若失，其過小小，無有大罪。阿難！汝受持深般若波羅蜜，若忘失一句，其過甚大。阿難！汝若受持深般若波羅蜜，後還忘失，其罪甚多。以是故，阿難！囑累汝是深般若波羅蜜，汝當善受持，讀誦令利。阿難！若有善男子、善女人受持深般若波羅蜜，則

2960

爲受持過去未來現在諸佛阿耨多羅三藐三菩提。阿難！若善男子善女人現在供養我，恭敬、尊重、讚歎、華香、瓔珞、香、澤香、衣服、幡蓋，應當受持般若波羅蜜，讀誦、說、親近、供養、恭敬、尊重、讚歎、華香，乃至幡幢。阿難！供養般若波羅蜜，則爲供養我，亦供養過去未來現在佛已。若有善男子善女人聞說深般若波羅蜜，信心清淨，恭敬愛樂，則爲信心清淨，恭敬愛樂過去未來現在諸佛已。阿難！汝愛樂佛，不捨離，當愛樂般若波羅蜜，莫捨離。阿難！深般若波羅蜜，乃至一句，不應令失。阿難！我說囑累因緣甚多，今但略說。如我爲世尊，般若波羅蜜亦是世尊，以是故，阿難！種種因緣囑累汝。般若波羅蜜，阿難！今我於一切世間天、人、阿修羅中，囑累汝，諸欲不捨佛、不捨法、不捨僧、不捨過去未來現在諸佛阿耨多羅三藐三

菩提者，慎莫捨般若波羅蜜。阿難！是我所教化弟子法。阿難！若善男子善女人受持深般若波羅蜜，讀誦、說、正憶念，復爲他人種種廣說其義，開示、演暢、分別，令易解，是善男子善女人疾得阿耨多羅三藐三菩提，疾近薩婆若。何以故？般若波羅蜜中生諸佛阿耨多羅三藐三菩提。阿難！過去未來諸佛阿耨多羅三藐三菩提，皆從般若波羅蜜中生。今現在東方、南方、西方、北方、四維、上下諸佛阿耨多羅三藐三菩提，亦從般若波羅蜜生。以是故，阿難！諸菩薩摩訶薩欲得阿耨多羅三藐三菩提，應當學六波羅蜜。何以故？阿難！六波羅蜜是菩薩摩訶薩母，生諸菩薩故。阿難！若有菩薩摩訶薩學是六波羅蜜，皆當得阿耨多羅三藐三菩提。以是故，我以六波羅蜜倍復囑累汝。阿難！是六波羅蜜是諸佛無盡法藏。阿難！十

方諸佛現在說法，皆從六波羅蜜法藏中出；過去諸佛亦從六波羅蜜中學，得阿耨多羅三藐三菩提；未來諸佛亦從六波羅蜜中學，得阿耨多羅三藐三菩提。過去、未來、現在諸佛弟子皆從六波羅蜜中學，得滅度，已得、今得、當得滅度。阿難！汝為聲聞人說法，令三千大千世界中衆生皆得阿羅漢果證，猶未為我弟子事。汝若以般若波羅蜜相應一句教菩薩摩訶薩，則為我弟子事。我亦歡喜，勝教三千大千世界中衆生，令得阿羅漢果。復次，阿難！是三千大千世界中衆生，不前不後，一時皆得阿羅漢果證。是諸阿羅漢，行布施功德、持戒、禪定功德，是功德多不？阿難言：「甚多世尊！」佛言：「阿難！不如弟子以般若波羅蜜相應法為菩薩摩訶薩說，乃至一日，其福多置一日；但半日，置半日；但一食頃，置一食頃，但

2963

大智度論卷七十九 釋禪樂品第六十六

三

大智度論卷七十九 釋禪樂品第六十六

三

須臾間說，其福多何以故？菩薩摩訶薩善根，勝一切聲聞、辟支佛。故菩薩摩訶薩自欲得阿耨多羅三藐三菩提，亦示教利喜他人，令得阿耨多羅三藐三菩提。阿難！如是菩薩行六波羅蜜行四念處，乃至行一切種智，增益善根，若不得阿耨多羅三藐三菩提，無有是處。

說是般若波羅蜜品時，佛在四衆中，天人、龍、鬼神、緊那羅、摩睺羅伽等，於大衆前而現神足變化。一切大衆皆見阿闍佛，比丘僧圍遶說法。大衆譬如大海，皆是阿羅漢，漏盡無煩惱，皆得自在，得好解脫，心解脫，慧解脫。其心調柔，譬如大象所作已辦，速得己利，盡諸有結，正智得解脫。一切心心數法中得自在。及諸菩薩摩訶薩無量功德成就。

2964

爾時佛攝神足一切大眾不復見阿闍佛聲聞人菩薩摩訶薩及其世界不與眼作對。何以故佛攝神足故。爾時佛告阿難「如是阿難一切法不與眼作對法法不相見法法不相知如是阿難如阿闍佛弟子菩薩世界不與眼作對如是阿難一切法不與眼作對法法不相知法法不相見何以故一切法無知無見無作無動不可捉不可思議如幻人無受無覺無真實菩薩摩訶薩如是行爲行般若波羅蜜亦不著諸法阿難菩薩摩訶薩如是學名爲學般若波羅蜜欲得諸波羅蜜當學般若波羅蜜何以故如是學名爲第一學最上學微妙學如是學安樂利益一切世間無護者爲作護是諸佛所學諸佛住是學中能以右手舉三千大千世界還著本處是中衆生無覺知者何以故阿難諸佛學是般若波羅蜜

過去未來現在法中得無礙智見阿難般若波羅蜜於諸學中最尊第一微妙無上阿難若有人欲得般若波羅蜜邊際爲欲得虛空邊際何以故阿難般若波羅蜜無有量我初不說般若波羅蜜量名衆句衆字衆是有量般若波羅蜜無有量阿難白佛言「世尊般若波羅蜜何以故無有量」佛告阿難「般若波羅蜜無盡故無有量般若波羅蜜離故無有量阿難過去諸佛皆學是般若波羅蜜得度般若波羅蜜故不盡未來世諸佛亦學是般若波羅蜜得度是般若波羅蜜故不盡現在十方諸佛皆學是般若波羅蜜得度般若波羅蜜故不盡已不盡今不盡當不盡阿難欲盡般若波羅蜜爲欲盡虛空般若波羅蜜不可盡已不盡今不盡當不盡。禪波羅蜜乃至檀波羅蜜不可盡已不盡今不盡當不盡乃至

一切種智亦如是。何以故？是一切法皆無生。若法無生，云何有盡？爾時佛出覆面舌相，告阿難：「從今日於四衆中廣演開示，分別般若波羅蜜，當令分明易解。何以故？是深般若波羅蜜中廣說諸法相。是中求聲聞、辟支佛、求佛者，皆當於中學學已，各得成就。阿難！是深般若波羅蜜則是一切字門。行是深般若波羅蜜能入陀羅尼門。學是陀羅尼諸菩薩得一切樂說辯才。阿難！般若波羅蜜是三世諸佛妙法。以是故，阿難！我爲汝了了說。若有人受持深般若波羅蜜讀誦親近，是人則能持三世諸佛阿耨多羅三藐三菩提。阿難！我說般若波羅蜜是行者足，汝持是般若波羅蜜陀羅尼故，則能持一切法。」

論問曰：釋提桓因何以自疑所說言我爲隨順法，正答不答曰：釋

提桓因非一切智人，雖得初道，三毒未盡，猶有錯謬。而自壽量，我雖福德因緣爲諸天主，雖得聖道味，而未有一切智。一切漏未盡，故所說或能錯謬，不自覺知，是故問。復次，衆中大有阿鞞跋致菩薩，漏盡阿羅漢及離欲諸天，是諸人見釋提桓因與佛須菩提共問難，心不怯弱。作是念：是釋提桓因漏尚未盡，何能問難盡諸法？邊釋提桓因以是事故問佛。復次，釋提桓因自知所說諸法相無違錯，求佛印可，使聽者信受，故佛即可之。問曰：佛何以可釋提桓因說？答曰：釋提桓因雖非一切智人，常從佛聞誦讀力強，是故所說有理，佛便印可。佛說有三種慧：聞慧、思慧、修慧。有人聞慧、思慧明了，故能與修慧人問難。譬如乘船隨流，不自用力而疾於陸行。如阿難雖未離欲，未得甚深禪定，而能與佛、漏盡阿羅漢等論議，

隨法無違。釋提桓因白佛言：世尊須菩提好樂說空，善巧說空，於諸弟子中最爲第一。有所言說，皆趣向空、無相、無作，所謂四念處，乃至阿耨多羅三藐三菩提，是法中皆和合畢竟空說。佛語釋提桓因：須菩提是行畢竟空人，世世修集，非但今世。是人以空解脫門入道，亦以此門教化衆生。是人若入深空法，尚不得法，何況行是法者。如經說檀波羅蜜不可得，何況行檀者。乃至八十隨形好不可得，何況得八十種隨形好者。須菩提所行空行，欲比菩薩空行，百分不及一。問曰：法空、衆生空，復有何不盡，而言百分不及一？答曰：佛此中自說，除佛、諸聲聞、辟支佛、無有及菩薩者。諸法實相，有種種名字，或說空，或說畢竟空，或說般若波羅蜜，或名阿耨多羅三藐三菩提。此中說諸法實相，名爲空行。如一切聲聞弟子中，

2969

須菩提空行最勝。如是，除佛、諸菩薩空行勝於二乘。何以故？智慧分別利鈍，入有深淺故，皆名得諸法實相，但利根者得之了了。譬如破闇故然燈，更有大燈，明則轉勝，當知先燈雖照，微闇不盡，若盡後燈則無用。行空者亦如是，雖俱得道，智慧有利鈍故，無明有盡不盡，唯有佛智慧能盡諸無明。復次，聲聞、辟支佛無慈悲心，無度衆生心，無淨佛世界，無無量佛法願，無轉法輪度衆生，亦無入無餘涅槃，乃至遺法度衆生願，無有三世度衆生心。所謂菩薩時、作佛時、滅度時，非但以空行故，與菩薩等。復次，二乘得空，有分有量，諸佛菩薩無分無量，如渴者飲河，不過自足，何得言俱行空不應有異？又如毛孔之空，欲比十方空，無有是理。是故比佛菩薩，千萬億分不及一。佛分別是空行，已告釋提桓因。若欲於一切衆生

2970

最上，當行般若波羅蜜。此中佛自說因緣。菩薩學是般若波羅蜜空行，不取空相故。過於二地，得無生忍法，入菩薩位。入菩薩位故，具足佛法。佛法是菩薩道，菩薩道具足故，當得一切種智。得一切種智，故名爲佛。斷一切煩惱。習人是諸事，空行爲根本。問曰：涅槃是無量，何以言二乘所得有量？答曰：言智慧有分有量，不說諸法。法性有量，不聞說大水喻耶？器有量，非水有量。復次，量無量相待法，於凡人是無量，佛皆能量。爾所分是須陀洹，乃至爾所分是阿羅漢、辟支佛、菩薩，餘殘究盡法性是佛。

爾時，會中諸天，以天曼陀羅華散佛等，如經中說。問曰：華供養佛及僧，是八百比丘何以獨取供養佛？答曰：諸天所散華，諸比丘當分所得。墮衣上者，見其色香甚妙，因以發心供養於佛。自言：我從

今日，當行是無上行，所謂畢竟空、無相、無作等，爲度一切衆生故，如佛所說，二乘所不及。爾時，佛微笑，微笑義如恆伽提婆品中說。是八百比丘是善知識，行同心等，世世共修集功德故，一時作佛，皆同一字。五色天華供養佛故，世界中常雨五色天曼陀羅華。佛因是事讚般若，作是言：阿難，欲行最上菩薩道，當行般若波羅蜜。阿難若有善男子能行是深般若波羅蜜，當知是人人道中來，或兜率天上來。所以者何？三惡道中罪苦多故，不得行深般若；欲界天著淨妙五欲，心則狂惑不能行；色界天深著禪定味，故不能行；無色界無形，故不能行；鬼神道眼等根利，諸煩惱覆心，故不能專行深般若；人道中苦差三惡道，樂不如諸天，眼等諸根濁重，身多地種故，能制苦樂意而行般若。兜率天上常有一生補處菩薩，彼

中諸天常聞說般若，五欲雖多，法力勝。是故說二處來。若從他方佛世界來，若此間有般若波羅蜜處來。復次阿難，若有求佛道者，能問能信受持，乃至正憶念，當知是人。佛常以佛眼見是諸人等。應當作是念：我等便是面從佛受，從佛發心種善根，不從二乘發。阿難，若有人信心清淨，不可破壞者，當知是人先世供養無量諸佛，爲善知識守護，故能受持。問曰：佛亦名爲寶，亦名爲無上福田。若人從佛種善根，必以三乘法入涅槃，不虛。如法華中說：有人或以一華，或以少香供養於佛，乃至一稱南無佛，如是等人皆當作佛。若爾者，有人作是念：但行五波羅蜜，欲作佛時，乃觀空，何用常行般若波羅蜜？難知難得空行。答曰：以是事故，佛自答阿難：於佛福田中，雖不虛誑，要得三乘入涅槃，應當了了行六波羅蜜，乃至

一切種智了了行故，疾得佛道，不久受生死苦。般若若有如是等利益功德，故應當行。

阿難，般若若有如是功德利益故，我囑累汝。問曰：佛無所食，乃至一切種智，佛無礙解脫，清淨微妙，諸佛法猶尚不食，何以故以般若波羅蜜殷勤囑累阿難，似如貪惜？答曰：諸佛爲利益衆生，故出世，現三十二相，八十種隨形好，無量光明，神足變化，皆爲衆生故。第

一利益衆生，無過般若波羅蜜，能盡諸苦故。是般若波羅蜜，因語言、文字、章句，可得其義，是故佛以般若經卷殷勤囑累阿難。復次，有人見佛殷勤囑累，故言佛大事辦，猶尚尊重般若，是法必尊必妙。譬如大富長者，命欲終時，以衆寶與兒，偏以如意寶珠，殷勤囑累汝，勿以此寶自無定色質，如虛空，微妙難識，故而不守護，若失

餘寶爲可，此寶不可失也！大富長者，是佛，以般若波羅蜜囑累阿難，汝好受持守護，無令忘失。除般若雖有十二部經，盡皆忘失，其過尙少；若失般若一句，其過太多！何以故？是深般若法藏，是十方三世諸佛母，能令人疾至佛道。如經中說：三世諸佛皆從般若得，乃至爲聲聞人說法，其中皆是讚般若事。問曰：說法令三千大千世界衆生盡得阿羅漢，云何不如以般若一句教菩薩？答曰：是事先雖答，今當更略說：是三千大千世界中衆生雖皆得阿羅漢，自度其身，不中作佛；若說般若一句，聞者得作佛。故如人種衆果樹，不如一人種一如意樹，能隨人所願，如意皆得。復次，爲聲聞說法中，無大慈大悲心，大乘法中，一句雖少，有大慈悲。聲聞法中皆自爲身，大乘法中廣爲衆生；聲聞法中無欲廣知諸法心，但欲疾離

老病死，大乘法中欲了了知一切法故；聲聞法功德有限，大乘法中欲盡諸功德，無有遺餘。如是等大、小差別，譬如金剛雖小，能勝一切寶，不得言少，故不如多。三千大千世界中阿羅漢福德，比般若一句教菩薩，一日乃至須臾，其福甚多！此中佛自說因緣：是人自欲得阿耨多羅三藐三菩提，亦教人令得，自行六波羅蜜諸功德，亦爲人說。菩薩集二處功德，不得佛道，無有是處。爾時佛欲明了是事故，引證亦欲證一切法空，不著是空法，但憐愍衆生故，囑累如阿闍佛大衆莊嚴，不與眼作對，一切法不與眼作對，亦如是。肉眼、天眼所見，皆是作法，虛誑不實；慧眼、法眼、佛眼，皆是無相無爲法，故不可見，若不可見，亦不可知。無作等亦如是。所見阿闍佛會如幻、如夢，能如是觀諸法，是名菩薩行般若，名無

所著。佛所囑累亦無所著，但以大慈悲故，讚是般若。一切法雖是不可思議相，而以利益衆生故讚歎。作是言：阿難！如是學，爲學般若，若欲得一切諸波羅蜜，當學般若波羅蜜。如是等，如經廣說。佛以無量讚般若，佛智慧不可盡，般若功德亦不可盡。何以故？般若波羅蜜無量相故。名衆等言語章句，卷數有量，如小品、放光、光讚等般若波羅蜜經卷章句，有限有量。般若波羅蜜義無量。阿難問：般若波羅蜜云何無量？佛答：般若波羅蜜相自離，離故從本已來不生不集，不生不集故不盡不滅。此中佛自說因緣：過去無量阿僧祇諸佛及弟子，用是般若波羅蜜，照明十方，度無量衆生，皆共入無餘涅槃。般若波羅蜜故不盡。未來現在亦如是。譬如有人欲盡虛空，虛空不可盡。般若波羅蜜等諸功德，乃至一切種智亦如

是。今不盡，已不盡，當不盡。有人知過去不盡，謂未來現在有盡，是故說三世不可盡。何以故？諸法本無生，云何當盡？佛知般若是真無盡，爲名字語言句衆有盡故囑累。如人以香油瓶囑累弟子，雖不惜瓶，爲受持香油故。語言能持義，亦如是。若失語言，則義不可得。

爾時佛爲人信受般若故，出舌相覆面，告阿難：我今於四衆中囑累汝般若，汝當爲衆生解說，顯示分別，令易解。所以現舌相者，世間相法，舌能覆鼻，是不妄語相。何況覆面？是故佛示衆生：我從父母生身，有此舌相，欲以般若波羅蜜令汝信解，以汝等未得一切智，不能徧知，欲令汝等信故，非以神通力所現。佛於甚深妙法，智慧禪定中猶尚不著，何況世間八法，供養利故而作虛誑！於一切

法中，如鳥飛虛空，無所觸礙，但以本願誓度衆生，大悲心憐愍一切故，以第一利般若波羅蜜，殷勤囑累汝。復次，阿難！是行深般若波羅蜜者，能入一切文字陀羅尼，因一字即入畢竟空，是名文字陀羅尼。如先陀羅尼中說。諸文字法，皆因般若波羅蜜得。餘聞持等諸陀羅尼，亦皆從學般若波羅蜜得。菩薩得諸陀羅尼已，得種種樂說辯才，無量阿僧祇劫，說一句義不可盡，是名三世諸佛眞法，更無異法。又復阿難！般若是十方三世諸佛妙法，如一門城，四方來者，無異門入。阿難！我今爲汝了了說。若有人受持般若，非但受持我法，是人受持三世諸佛阿耨多羅三藐三菩提。阿難！是般若波羅蜜，我處處說，是行者足所以者何？菩薩得是般若，能行菩薩道。阿難！汝得是般若波羅蜜陀羅尼故，能持一切佛所說法。問

2979

曰：以聞持陀羅尼力，故能持。何以言得般若故，能持一切諸佛法？答曰：聞持陀羅尼，能持有數有量法，世間亦有。如須尸摩外道，亦得聞持陀羅尼，是人雖少時得，久則忘失。從般若得陀羅尼，廣受持諸法，終不忘失，以是爲差別。問曰：般若便是波羅蜜，何以名爲陀羅尼？答曰：諸法實相是般若，能種種利益衆生愛念，故作種種名，如佛有十號等。文字般若波羅蜜亦如是，能到一切諸智慧邊，是名爲般若波羅蜜。菩薩行般若作佛已，變名爲阿耨多羅三藐三菩提。若在小乘心中，但名爲三十七品，三解脫門。若人欲得聞而不忘，在是人心中名爲陀羅尼。是故佛說如意珠譬喻，隨前物色變爲名。佛如是種種說般若大功德。

2980

大智度論卷第八十

龍樹菩薩造

姚秦三藏法師鳩摩羅什譯

釋無盡品第六十七

釋作不可盡品

經爾時須菩提作是念：「是諸佛阿耨多羅三藐三菩提甚深，我當問佛。作是念已，白佛言：「世尊是般若波羅蜜不可盡。」佛言：「虛空不可盡故，般若波羅蜜不可盡。」世尊云何應生般若波羅蜜？」佛言：「色不可盡故，般若波羅蜜應生；受、想、行、識不可盡故，般若波羅蜜應生；檀波羅蜜不可盡故，般若波羅蜜應生；尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜不可盡故，般若波羅蜜應生；乃至一切種智不可盡故，般若波羅蜜應生。」

2981

大智度論卷八十 釋無盡品第六十七

大智度論卷八十 釋無盡品第六十七

二

復次，須菩提！癡空不可盡故，菩薩摩訶薩般若波羅蜜應生；行空不可盡故，菩薩般若波羅蜜應生；識空不可盡故，菩薩般若波羅蜜應生；名色空不可盡故，菩薩般若波羅蜜應生；六處空不可盡故，菩薩般若波羅蜜應生；六觸空不可盡故，菩薩般若波羅蜜應生；受空不可盡故，菩薩般若波羅蜜應生；愛空不可盡故，菩薩般若波羅蜜應生；取空不可盡故，菩薩般若波羅蜜應生；有空不可盡故，菩薩般若波羅蜜應生；生空不可盡故，菩薩般若波羅蜜應生；老、死、憂、悲、苦、惱空不可盡故，菩薩般若波羅蜜應生。如是，須菩提！菩薩摩訶薩般若波羅蜜應生，須菩提！十二因緣是獨菩薩法，能除諸邊顛倒。坐道場時，應如是觀，當得一切種智。須菩提！若有菩薩摩訶薩，以虛空不可盡法，行般若波羅蜜，觀十二因緣，不墮

2982

聲聞、辟支佛地，住阿耨多羅三藐三菩提。須菩提！若求菩薩道而轉還者，皆離般若波羅蜜念。故是人不知云何行般若波羅蜜，以虛空不可盡法觀十二因緣。須菩提！若求菩薩道而轉還者，皆不得是方便力故，於阿耨多羅三藐三菩提而轉還。須菩提！若菩薩摩訶薩於阿耨多羅三藐三菩提不轉還者，皆得是方便力故。須菩提！菩薩摩訶薩應以虛空不可盡法觀般若波羅蜜，應以虛空不可盡法生般若波羅蜜。如是，須菩提！菩薩摩訶薩觀十二因緣時，不見法無因緣，生不見法常不滅，不見法有我、人、壽者、命者、衆生，乃至知者、見者、不見法無常，不見法苦，不見法無我，不見法寂滅，非寂滅。如是，須菩提！菩薩摩訶薩行般若波羅蜜，應如是觀十二因緣。須菩提！若菩薩摩訶薩能如是行般若波羅蜜，是時不見

2983

色若常、若無常、若苦、若樂、若我、若無我、若寂滅、若非寂滅，受想行識亦如是。須菩提！菩薩摩訶薩是時亦不見般若波羅蜜，亦不見以是法見般若波羅蜜、禪波羅蜜，乃至阿耨多羅三藐三菩提，亦不見阿耨多羅三藐三菩提，亦不見以是法見阿耨多羅三藐三菩提。如是，須菩提！一切法不可得故，是爲應般若波羅蜜行。若菩薩行無所得般若波羅蜜時，惡魔愁毒如箭入心，譬如人新喪父母。如是，須菩提！惡魔見菩薩行無所得般若波羅蜜時，便大愁毒如箭入心。須菩提！白佛言：「世尊！但一魔愁毒，三千大千世界中魔亦復愁毒。」佛告須菩提：「三千大千世界中諸惡魔皆愁毒如箭入心，各於其座不能自安。須菩提！菩薩摩訶薩能如是行般若波羅蜜，是時一切世間天及人、阿修羅，不能得其便，令其憂惱。須

2984

菩提！以是故，菩薩摩訶薩欲得阿耨多羅三藐三菩提，當行是般若波羅蜜。」

「菩薩摩訶薩行般若波羅蜜時，具足修檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜。須菩提！菩薩摩訶薩行般若波羅蜜時，具足諸波羅蜜。」須菩提白佛言：「世尊！菩薩摩訶薩行般若波羅蜜時，云何具足檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜？」佛告須菩提：「菩薩摩訶薩所有布施，皆迴向薩婆若。如是，須菩提！菩薩摩訶薩行般若波羅蜜時，具足檀波羅蜜。須菩提！菩薩摩訶薩所有持戒，皆迴向薩婆若。是為具足尸羅波羅蜜。菩薩摩訶薩所有忍辱，皆迴向薩婆若。是為具足羼提波羅蜜。菩薩摩訶薩所有精

進，皆迴向薩婆若。是為具足毗梨耶波羅蜜。菩薩摩訶薩所有禪定，皆迴向薩婆若。是為具足禪波羅蜜。菩薩摩訶薩所有智慧，皆迴向薩婆若。是為具足般若波羅蜜。如是，須菩提！菩薩摩訶薩行般若波羅蜜，具足六波羅蜜。」

釋曰：須菩提從佛聞般若波羅蜜種種相，初聞畢竟空相。中聞囑累，如似有。後還聞說空，所謂般若義無量，名字句衆有量。是時，須菩提作是念：諸佛阿耨多羅三藐三菩提甚深，我當問佛。所以甚深，佛說菩提少許分，但為破衆生顛倒故，不具足說。所以者何？無能受者故。若人取如相，佛言如亦空。無生住滅，故若法無生住滅，是法即無法性。實際亦如是。若有取畢竟空者，亦言非也。何以故？若畢竟空是定相可取，是非畢竟空。是故言甚深，我當更問佛。

須菩提作是念已，如佛自說，三世諸佛用般若波羅蜜得道，般若故不盡，已不盡，今不盡，當不盡，是故我今但問不盡義。佛答如虛空不盡，故般若亦不盡。如虛空無有法，但有名字，般若波羅蜜亦如是。般若波羅蜜如虛空無所有，故不可盡。云何菩薩能生是般若波羅蜜？能生者，菩薩云何心中生能行能得？佛答：色無盡，故般若波羅蜜應生。如色初後中生不可得，色即「色即應是即色之義」生色不可得，離色生色不可得，生不可得，生生不可得，如先破生中說。生不可得，故色亦不可得，色不可得，故色生不可得。二法不可得，故色如幻，如夢，但誑人眼。若色有生，必有盡，以無生故亦無盡。色真相，即是般若波羅蜜相，是故說色不可盡，般若波羅蜜亦不可盡。受、想、行、識、檀波羅蜜乃至一切種智，亦如是。復次，應生般若者，無明虛

2987

空不可盡。故若人但觀畢竟空，多墮斷滅邊，若觀有多，墮常邊。離是二邊，故說十二因緣空。何以故？若法從因緣和合生，是法無有定性。若法無定性，即是畢竟空寂滅相。離二邊，故假名為中道。是故說十二因緣如虛空無法，故不盡。癡亦從因緣和合生，故無自相，無自相，故畢竟空如虛空。復次，因緣生故無實，如經中說：因眼緣色，生濁念，濁念從癡生，濁念不在眼中，不在色中，不在內，不在外，亦不在中間，亦不從十方三世來，是法定相不可得。何以故？一切法入如故。若得是無明定相，即是智慧，不名為癡。是故癡相智慧相無異，癡實相即是智慧，取著智慧相即是癡。是故癡實相畢竟清淨，如虛空無生無滅。是故說得是觀，故迴向阿耨多羅三藐三菩提，即名般若波羅蜜。問曰：若無無明，亦無諸行等，云何說十

2988

二因緣答曰說十二因緣有三種。一者凡夫肉眼所見顛倒著我心起諸煩惱業往來生死中。二者賢聖以法眼分別諸法老病死心厭欲出世間求老死因緣由生故是生由諸煩惱業因緣。何以故無煩惱人則不生是故知煩惱爲生因煩惱因緣是無明無明故應捨而取應取而捨何者應捨老病諸苦因緣煩惱應捨以少顛倒樂因緣故而取持戒禪定智慧諸善根本是涅槃樂因緣是事應取而捨是中無有知者見者作者何以故是法無定相但從虛誑因緣相續生行者知是虛誑不實則不生戲論是但滅苦故入於涅槃不究盡求諸苦相三者諸菩薩摩訶薩大智人利根故但求究盡十二因緣根本相不以憂怖自沒於時不得定相老法畢竟空但從虛誑假名有所以者何分別諸法相者說老是心不

2989

相應行是相不可得。頭白等是色相非老相。一事不可得故無老相。復次世人名老相髮白齒離面皺身曲羸瘦力薄諸根闇塞如是等名老相。但是事不然所以者何髮白非唯老者又年壯而白老年而黑者羸瘦皺曲亦爾有人老而諸根明利少而闇塞者又服還年藥雖老而壯如是老無定相無定相故諸法和合假名爲老又如假輪軸輻輳等爲車是假名非實復次有人言說果報五衆故相名爲老是亦不然所以者何一切有爲法念念生滅不住若不住則無故無故則無老一切有爲法若有住則無無常若無無常即是常若常則無老何況非常非無常畢竟空中而有老復次諸法畢竟空中生相不可得何況有老如是等種種因緣求老法不可得不可得故無相如虛空不可盡如老乃至無明亦如

2990

是破無明，如上說。菩薩觀諸法實相畢竟空無所有，無所得，亦不著是事故，於衆生中而生大悲。衆生愚癡，故於不實顛倒虛妄法中受諸苦惱。初十二因緣，但是凡夫人故，於是中不求是非。第二十二因緣，二乘人及未得無生忍法菩薩所觀。第三十二因緣，從得無生忍法，乃至坐道場菩薩所觀。是故說無明虛空不可盡，乃至憂悲苦惱虛空不可盡。故菩薩行般若波羅蜜，如是深觀因緣法，離諸邊顛倒者，邊名常邊、斷滅邊、有邊、無邊、實邊、空邊。世間有邊等諸邊顛倒者，無常中起常等諸顛倒煩惱，觀是十二因緣法，諸邊顛倒滅，諸煩惱有二分：一者，外道邪見人名爲邊；二者，餘衆生煩惱名爲顛倒。觀十二因緣，是二種煩惱皆滅，是第三十二因緣觀甚深，唯諸菩薩坐道場者能觀，先雖能觀，未能具足。如城

2991

譬喻經中說佛言：我本未得道時，如是思惟衆生可愍，深入嶮道，所謂數數生、數數老、數數死，往來世間，不知出處。我即時復作是念：何因緣有老死？如是求覓時得實智慧，生因緣是老死等。是故知第三觀，坐道場乃得，如經廣說。又復觀如是因緣法，過於二乘，得一切種智。若有人於佛道退者，皆不得是甚深觀，故若得是觀，則不退。何以故？深入畢竟空中，則不見聲聞、辟支佛地，不見故，則不於是中住。復次，能如是觀因緣法者，不見有一法定自在無因緣而生，一切法不自在，皆屬因緣生。有人雖見一切法從因緣生，謂爲從邪因緣生。邪因緣者，微塵、世性等。是故說不見法無因緣生，亦不見法從常因緣、微塵、世性生。如虛空常，常故則無生，虛空亦不與物作因，以是故，無有法從常因緣生。復次，菩薩如是觀一

2992

切法屬因緣生不自在不自在故無我乃至無知者見者爾時菩薩安住畢竟空十二因緣中不見一切色等法若有若無等亦不見般若亦不見用是法行般若乃至阿耨多羅三藐三菩提亦如是是名菩薩無所得般若波羅蜜得是無所得般若於一切法中便得無所障礙般若爾時諸魔極大愁毒何以故以是菩薩深入十二因緣畢竟空中不著有無非有非無等六十二諸邪見魔網我今無有法可得菩薩便譬如捕魚人見一魚深入大水鉤網所不及則絕望憂愁亦如新喪父母

復次菩薩能如是行無所得般若波羅蜜則能具足檀波羅蜜等何以故行如是法諸煩惱障般若法皆折薄諸魔人民不能得便故諸波羅蜜得具足先來雖行六波羅蜜未能得如是具足須菩

提問：世尊！菩薩云何能行如是般若波羅蜜能具足檀波羅蜜等諸波羅蜜？佛答：若菩薩所有布施皆迴向薩婆若者有二種人：軟根、利根。軟根者少多布施皆取相迴向阿耨多羅三藐三菩提；利根者破是取相而戲論空法信力轉薄不用薩婆若但求諸法實相。是二種人皆不能具足檀波羅蜜。一者以信力多慧力少；二者以慧力多信力少。故佛今說信力慧力等故能迴向薩婆若。念薩婆若者是信力如薩婆若迴向者是智力乃至般若波羅蜜亦如是。

### 釋六度相攝品第六十八之上

須菩提白佛言：「世尊！云何菩薩摩訶薩住檀波羅蜜取尸羅波羅蜜？」佛告須菩提：「菩薩摩訶薩布施時持是布施迴向薩

婆若於衆生中住慈身口意業是爲菩薩住檀波羅蜜取尸羅波羅蜜。世尊云何菩薩住檀波羅蜜取辱提波羅蜜。佛告須菩提。菩薩布施時受者瞋恚罵辱惡言加之是時菩薩忍辱不生瞋心是爲菩薩住檀波羅蜜取辱提波羅蜜。世尊云何菩薩住檀波羅蜜取毗梨耶波羅蜜。佛言。菩薩布施時受者瞋恚罵辱惡言加之菩薩增益布施心作是念我應當施不應有所惜。即時生身精進心精進是爲菩薩住檀波羅蜜取毗梨耶波羅蜜。世尊云何菩薩摩訶薩住檀波羅蜜取禪波羅蜜。佛言。菩薩布施時迴向薩婆若不趣聲聞辟支佛地但一心念薩婆若是爲菩薩住檀波羅蜜取禪波羅蜜。世尊云何菩薩摩訶薩住檀波羅蜜取般若波羅蜜。佛言。菩薩布施時知布施空如幻。

2995

不見爲衆生布施有益無益是爲菩薩住檀波羅蜜取般若波羅蜜。須菩提白佛言。世尊云何菩薩摩訶薩住尸羅波羅蜜取檀波羅蜜辱提波羅蜜毗梨耶波羅蜜禪波羅蜜般若波羅蜜。佛告須菩提。菩薩摩訶薩住尸羅波羅蜜中身口意生布施福德助阿耨多羅三藐三菩提持是功德不取聲聞辟支佛地住尸羅波羅蜜中不奪他命不劫奪他家物不行邪淫不妄語不兩舌不惡口不綺語不貪嫉不瞋恚不邪見所有布施飢者與食渴者與飲須乘與乘須衣與衣須香與香須瓔珞與瓔珞塗香臥具房舍燈燭資生所須盡給與之持是布施與衆生共之迴向阿耨多羅三藐三菩提如是迴向不墮聲聞辟支佛地須菩提是爲菩薩摩訶

2996

薩住尸羅波羅蜜取檀波羅蜜。世尊云何菩薩摩訶薩住尸羅波羅蜜取羼提波羅蜜。佛言：「菩薩摩訶薩住尸羅波羅蜜中，若有衆生來節節支解菩薩於是中不生瞋心，乃至一念作是言：我得大利，衆生來取我支節用我無一念瞋志，是爲菩薩住尸羅波羅蜜中取羼提波羅蜜。」世尊云何菩薩摩訶薩住尸羅波羅蜜取毗梨耶波羅蜜。佛言：「若菩薩摩訶薩身精進，心精進，常不捨作是念：一切衆生在生死中，我當拔著甘露地，是爲菩薩住尸羅波羅蜜中取毗梨耶波羅蜜。」世尊云何菩薩摩訶薩住尸羅波羅蜜取禪波羅蜜。佛言：「菩薩入初禪、第二、第三、第四禪，不貪聲聞、辟支佛地，作是念：我當住禪波羅蜜中，度一切衆生生死，是爲菩薩摩訶薩住尸羅波羅蜜取禪波羅蜜。」世尊云何菩

2997

薩摩訶薩住尸羅波羅蜜取般若波羅蜜。佛言：「菩薩住尸羅波羅蜜中，無有法可見。若作法，若有爲法，若數法，若相法，若有若無，但見諸法不過如相。以般若波羅蜜遍和拘舍羅力故，不墮聲聞、辟支佛地，是爲菩薩住尸羅波羅蜜取般若波羅蜜。」

論釋曰：上品未說，云何菩薩行般若波羅蜜時，具足六波羅蜜。佛一一答此品中須菩提問，云何菩薩行一波羅蜜攝五波羅蜜。問曰：六波羅蜜各各異相，云何行一波羅蜜攝五波羅蜜。答曰：菩薩以方便力故，行一波羅蜜能攝五波羅蜜。復次，有爲法，因緣果報相續故相成，善法、善法因緣故，是波羅蜜皆是善法故，行一則攝五，以一波羅蜜爲主，餘波羅蜜有分。有菩薩摩訶薩深行檀波羅蜜，安住檀波羅蜜中，布施衆生時，得慈心，從慈能起慈身、口業，是

2998

時菩薩即取尸羅波羅蜜。何以故？慈業是三善道，尸羅波羅蜜根本，所謂不貪、不瞋、正見，是三慈業能生三種身業、四種口業。慈即是善業，為利益衆生故，名為慈。取屬提波羅蜜者，菩薩為一切智慧故，布施受者瞋。若施主唱言：我能一切施，受者不得稱意，便是言誰使汝請我而不隨我意。瞋者是心惡業，罵者是口惡業，打害者是身惡業。瞋有上、中、下：上者害殺，中者罵詈，下者心瞋。爾時，菩薩不生三種惡業，意業是根本故，但說意業，作是念：是我之罪，我請彼人而不能得稱意，由我薄福，不能具足施與。我若瞋者，既失財物，又失福德，是故不應瞋。取毗梨耶波羅蜜者，若菩薩布施時，受者打害，心不沒不捨，布施如先說，為布施故，身心勤精進，作是念：我先世不強意布施，故今不能得稱受者意，但當勤布施，不

2999

應計餘小事。取禪波羅蜜者，菩薩布施不求今世福樂，亦不求後世轉輪聖王、天王、人王，亦不求世間禪定樂，為衆生故，不求涅槃樂。但攝是諸意，在一切種智中，不令散亂。取般若波羅蜜者，菩薩布施時，常觀一切有為作法虛誑不堅固，如幻、如夢。施衆生時，不見有益無益。何以故？是布施物，非定是樂因緣，或時得食腹脹而死，或時得財為賊所害，亦以得財物故，生慳貪心而墮餓鬼中。又此財物有為相，念念生滅無常，生苦因緣。復次，此財物入諸法實相，畢竟空中，不分別有利無利，是故菩薩於受者不求恩分，於布施不望果報。設求報者，若彼不報，則生怨恨。菩薩作是念：諸法畢竟空故，我無所與。若求果報，當求畢竟空。阿耨多羅三藐三菩提。如布施相，是故不見有益，以畢竟空故，亦不見無益。如是於檀

3000

波羅蜜邊，取五波羅蜜。

菩薩以尸羅波羅蜜為主，所有身、口、意善業布施，多聞、思惟、持戒等助。阿耨多羅三藐三菩提，持戒力大故，總名尸羅波羅蜜。何以故？欲界中持戒爲上，餘布施、聞思、修慧等，以欲界心散亂故，得力微薄。如阿毗曇中說：出法名欲界繫，或色、無色界繫淨禪定、學、無學法及涅槃。菩薩以是持戒等法，不趣聲聞、辟支佛地，但安住尸羅波羅蜜中，不奪衆生命，乃至不爲邪見住，是助道戒，具足十善道戒。菩薩住是一種戒中，布施衆生，須食與食等義，如初品中說。皆以此福迴向佛道，不趣二乘。何以故？菩薩有二種破戒：一者，十不善道；二者，向聲聞、辟支佛地。與此相違，則是一種持戒。取屢提波羅蜜者，菩薩住尸羅波羅蜜，欲具足忍辱波羅蜜，若衆生來節

3001

節支解持去，乃至不生一念瞋心。何況起身、口惡業？問曰：忍辱名一切侵奪能忍，何以但說割截身體？答曰：所著物有內外，內名自身、頭目、髓腦等，外名妻子、珍寶等。雖俱是著處，內著最深。復次，或有人雖隨逐財物而死，亦是爲身故。又復人多惜身，時有惜財，惜財者少，故不說。復次，是人尚不惜身，何況餘物！是故但說大因緣，當知已攝小者。問曰：乃至不生一念瞋心者，爲是變化身，爲是父母生身？若是變化身，則不足爲奇；若是父母生身，未斷結人，云何能不生一念瞋心？答曰：有人言：煩惱業因緣生身，是菩薩於無量劫，爲衆生修集慈心故，雖有割截，不生瞋心。如慈母養育嬰兒，雖復屎尿汗身，以深愛故而不生瞋，又愍其無知。菩薩於衆生亦如是，未得聖道者，皆如小兒，我爲菩薩應生慈心，當如父母。衆生雖

3002

復加惡於我，我不應瞋。何以故？衆生不自在，煩惱所使故。復次，菩薩無量劫來常修畢竟空法，不見害者，罵者亦不見善者，惡者皆如幻、如夢，諸瞋恚者皆愚癡，若我報彼與彼無異。復次，菩薩作是念：我應瞋處而不瞋，則爲大利。取毗梨耶波羅蜜者，住尸羅波羅蜜多是出家人，時有在家者。一切出家人得無量戒律儀，具足四十種善道，深入諸法實相，過聲聞、辟支佛地。是三種戒，名尸羅波羅蜜。在家者無無量戒律儀，是故不具足住尸羅波羅蜜。菩薩作是念：我今捨世樂入道，不可但住持戒，持戒是餘功德，住處若但得住處，不得餘功德者，得利甚薄。譬如人在寶洲，但得水精珠，則所利益薄。是故菩薩欲具足五波羅蜜，故身心勤精進。身精進者，如法致財，以用布施等；心精進者，慳貪等諸惡心來破六波羅蜜。

者，不令得入。得此二種精進已，應作是念：一切衆生沈沒生死，我應拯濟，著甘露地。聲聞人但度一身，尚不應懈怠，何況菩薩自度及爲一切衆生而當懈怠？以是事故，我不應懈廢。雖身疲苦心不應息。所以者何？此大乘法若不運用，則爲敗壞。取禪波羅蜜者，菩薩住尸羅波羅蜜，或未得無生忍法，故諸煩惱風吹動願樹，欲壞其尸羅波羅蜜。爾時，應求禪定樂，除卻五欲樂。五欲樂除，戒得清淨，煩惱雖未斷，已折伏，故不能生亂。譬如毒蛇，以呪術力，故毒不得螫。禪者，四禪、四無色定、四無量心等諸禪定。菩薩得禪，心雖柔軟，安住尸羅波羅蜜，故亦不取聲聞、辟支佛地。是菩薩但作是念：我應行禪波羅蜜，不爲小乘涅槃，亦不爲果報，但爲度一切衆生故，說諸法實相。是實智從禪定生，是心不爲覺觀所動，亦不爲

貪欲、瞋恚所濁，繫心一處，清淨柔軟，則能生實智，如水澄靜，照鑒分明。菩薩住尸羅波羅蜜，得是禪，得禪故心清淨，心清淨故知諸法如實。有為法從因緣和合生，虛誑菩薩以慧眼觀，不見是有為法實。有為法有種種名，所謂作法、有為、數法、相法，若有若無，以有為故，可說無為。有為相尚不可得，何況無為！問曰：有為法是有相，無為法是无相，今何以有為相中說無相？答曰：無為有二種。一者，無相寂滅，無戲論如涅槃；二者，相待無因有而生，如廟堂上無馬，能生無心，此無心是生諸煩惱因緣。云何是无為法？是菩薩不見此有、無等法，但見諸法如法性實際。問曰：汝先言離有則無，無，今云何見如法性實際？答曰：不見有為法，若常、樂、我、淨等，是虛誑法。若無，即是諸法實。見無生法故，能離有生法，是无生法，無定實相。

可取，但能令人離虛誑有生法故，名無生。若得如是智慧，以方便力，本願悲心故，不取二乘證，直至阿耨多羅三藐三菩提，是名菩薩住尸羅波羅蜜，取五波羅蜜。

大智度論卷第八十

音釋

薩婆若 梵語也，多含不盡，乃總業。 誑 古況切，詐也。 面皴 皴，鋪教切，面皮皺也。 闇塞 闇，烏紺切，不明也。塞，悉則切，不通也。 輶 輶，于元切，輶至向之名也。若爾者切。 輶 輶，音福。  
 嶮 輶，音福。 數數 並色角切，類也。 瞋恚 瞋，稱人切，怒而張目也。恚，於禮切，怒也。 腹脹 腹，方六切，脹知死切。 阿毗曇 梵語也，比云無戲，戲，徒南切。 戲 徒南切。

行義也